

208



6

39-b

12

795.



6-39-b-12

A 15 208. f. v.



CHRISTOPHORI  
RANZOVII

Equitis Holsati

EPISTOLA  
AD GEORGIVM CALIXTVM  
Professorem Helmstedensem

*Qua sui ad Ecclesiam Catholicam  
accessus rationes exponit.*

*Bibliotheca*

*transpontina.*



EXCVSA ROMÆ MDCLXII.

Typis S. Congreg. de Propaganda Fide.

SUPERIORVM PERMISSV.

CHRISTOPHER

1847 & 1848

1849

1850

1851

1852

1853

1854

1855

1856

1857

1858

1859

1860

1861

1862


1863

1864


1865

I  
CL. DOCTISSIMOQVE VIRO  
GEORGIO CALIXTO  
CHRISTOPHORVS RANZOVIVS

*Sal. plur. dicit, vouetque eternam.*



LITERAS tuas a. d. vi. Maij  
datas, doctissime idemq; opti-  
me Calixte, plane quales spe-  
rabam accepi, nempe mode-  
stia & humanitatis, tum vero officiosi er-  
ga me affectus plenas. Indicant illæ, iti-  
dem vt aliæ sub idem tempus ex patria  
perlata, quam solliciti mea de re fuerint  
homines sui omnium incuriosissimi: qui  
cum nihil Romæ spectatu dignum putent  
præter publicorum operum moles, & pri-  
sci splendoris indices parietinas; nec nisi  
cum stabularijs, lanistis, & saltatoribus  
plerique versentur, me viros pios doctos-  
que frequentantem, quibus hæc vrbs abun-  
dat, in fidei catholicæ veritatem inquire-  
re ægreferunt. Sed illi de se viderint: ego  
quidem pro eo quo teneor æternæ felici-  
tatis desiderio, studij humani curiositatem  
nusquam melius exerceri credo, quam in



negotio salutis; quæ extra vnam veramq;  
Christi Ecclesiam sperari nullo modo po-  
test. Proinde cum hæc præcipua Italicæ  
profectionis caussa mihi fuerit, sedulo hic  
disquirendum mihi existimaui de religio-  
nis capitibus, quæ Septentrionem infelici  
schismate separant a Romana cæteraque  
catholica Ecclesia. Eamque ad rem per-  
opportuna mihi accidit amicitia Lucæ  
Holstenij, sacerdotis catholici ex Trans-  
albiana nostra; viri & eruditione & hu-  
manitate singulari, & in SS. Patrum &  
Conciliorum lectione versatissimi. In eo  
præcipue me delectauit, quod ab omni  
sophistica futilitate & logomachia abhor-  
reat; quippe qua veritatem catholicam  
luce meridiana clariorem, obfuscari tantū  
tenebrisq; inuolui existimat. Eius consi-  
lio in discernendis fidei controuersijs re-  
gulam Vincentij Lirinensis, quem tua com-  
mendatione nosse & amare cæperam; ad-  
hibui: scilicet, diuinæ legis auctoritatem,  
& Ecclesiæ catholicæ traditionem: itaut  
verum & indubitatum crederem quicquid  
sacra scriptura docet, dummodo inter-  
pretationis eius linea secundum ecclesia-  
stici & catholici sensus normam dirigat-  
tur;



tur; non iuxta peculiarem cuiuscunque demum veteris aut nouæ sectæ opinionem detorqueatur.

Huius regulæ ductu dubitare non potui, quin ea certissima sacræ scripturæ mens esset, & vera ac genuina ecclesiæ catholicæ doctrina, quam proxime ab Apostolis acceptam probatissimi primorum quinq; sæculorum Patres, & quatuor Concilia generalia, quatuor Euangelij antiquorū iudicio comparanda, tradiderunt: tum etiam quod supparet ijsdem temporibus historiæ ecclesiasticæ auctores scripto nobis consignatum vnanimi consensu reliquerunt: nec aliunde primitiuæ Ecclesiæ sensum clarius certiusq; erui posse existimaui. Ita vt, quæcumq; primis istis sæculis in dogmatibus fidei, Ecclesiæ Sacramentis, eorumq; usu & ritibus; tum etiam in politia & disciplina publica, vbique, semper, & ab omnibus credita, probata, & vsitata fuisse certo sciam, ea pro veris, & catholicis dogmatibus, sacramentis, ritibus, legibusque ecclesiasticis amplectar & teneam. E contra eos, qui vel olim publicam istā vniuersæ ecclesiæ doctrinam peruicaciter negarunt, adulterarunt, im-

pugnarunt ; vel hoc tempore, veterum quorundam exemplo, negant aut impugnant, ideoque Ecclesiæ communionem deferunt ; hæreticos, schismaticos ; nouatores, & Ecclesiæ perturbatores fuisse, atque etiam nunc esse pronunciare non verear.

Quocirca primum ac præcipuum huius disquisitionis caput esse duxi, vt in ipsius Ecclesiæ nomen, naturam, & notas siue attributa sedulo inquirerem ; quæ secundum Apostolum, domus Dei est, columna & firmamentum veritatis : & iuxta fidei symbolum, vna, sancta, Catholica, & Apostolica credi debet. Principio enim nisi vna sit, Ecclesia esse nequaquam potest. Cum enim corpus sit Christi capitis sui ; vnus autem capitis non nisi corpus vnum esse possit, vnā tantum, quacumque diffunditur, Ecclesiam esse necesse est. Ea autem vnitas vnus eiusdemq; fidei veritate, eorundem sacramentorum communionē, pacis deniq; & concordiae communis vinculo continetur. Ideoq; vbi fides diuersa est, & sacramenta non eadem celebrantur, neque coniuncta vnus fraternitatis in vna Dei domo cohabitatio, ibi  
Ec-

Ecclesia vna non est. Vnde iam olim hac de re pronuntiauit Cyprianus: Deus vnus est, & Christus vnus, & vna Ecclesia eius, & fides vna, & plebs in solidam corporis vnitatem concordiae glutino copulata. Scindi vnitas non potest: nec corpus vnū dissidio compaginis separari, diuulsis laceratione visceribus in frustra discerpi. Quicquid enim à matrice discesserit, seorsim viuere & spirare non poterit, substantiam salutis amittit. Ex quo sequitur Catholicam Ecclesiam, quæ præcipua a parte Romana dicitur, cum Lutherana, Caluianiana, vel Anabaptistica vnam eandemque Ecclesiam nec esse, nec fingi posse. Cum istæ non solum ab ea discrepent multis fidei capitibus, diuersisque sacramentis; sed hostili quoque odio dissideant. Omnes enim istæ sectæ a Romana ecclesia eam ob causam superiori sæculo se diiunxerunt, quod non Ecclesiam Dei, sed satanæ regnum, & Antichristi sedem, atque ipsissimam Babylonem eam existimarent; ideoque Luthero classicum canente, omnibus salutem in Christo sperantibus, & animo & corpore fugiendam crederent. Neque hæcenus susceptum semel

odium posuerunt. cum hoc ipso tempore Ecclesiæ hostes rerum potiti, templa Catholicorum inuadant, bonis spolient, Episcopatus suppriment, Monasteria subuertant, suæque sectæ doctrinam Catholicæ fidei abrogatæ substituunt.

Sanctam quoque credimus & profiteamur Ecclesiam, quam Christus ipse, teste Apostolo, sanguine suo sanctificauit, mundans eam lauacro aquæ in verbo, ut exhiberet ipsam sibi gloriosam, non habentem maculam aut rugam, aut aliquid huiusmodi, sed ut sit sancta & immaculata. Quod cum Augustino retr. l. 1. c. 18. & alibi, ita intelligimus, non quasi iam sit, sed quæ præparatur ut sit, quando apparebit etiam gloriosa. Sancta tamen, quam Spiritus sanctus Christi Domini, ut cum Tertulliano loquar, vicarius nunquam deseruit, nunquam deseret; sed virtutum vbertate fecundat, & sanctitatis magistram populo Dei constituit. Sane cum singulari Dei instinctu animus meus inde a puero ad veram pietatem anhelaret, & pauca a nostris scripta reperirem igni illi cælesti fouendo opportuna, quo diuini amoris incendium exardesceret; oblati mihi tunc

catholicorum scriptorum meditationibus sacris, coepi statim persentiscere, quanto suauius vberiusq; Ecclesiæ illius filij de matris suæ vberibus spiritus dulcedinem, & pietatis nutrimentum sugerent, quam qui externæ nutricis exsuccas & arêtes mammas inani labore fatigant. Eoque prima mihi de Ecclesiæ illius statu cognoscendo suborta est cogitatio, neque enim verisimile videbatur in ea arbore fidei medullam exaruisse, quæ tam vberes pietatis fructus gigneret.

Atque istam tunc coniecturam minime me fefellisse abunde deinceps Catholicorum hominum usu & conuersatione expertus sum; maxime cum ad urbem accessissem. Nam vbi tu superstitionibus, nugis, & nouitatibus me offensum iri existimasti, ibi insperato planeq; admirando spectaculo vniuersa Catholicæ Ecclesiæ facies antiquæ pietatis sanctitatisq; plena, oculis animoque meo sese aperuit, in ipso lubilæi, quod INNOCENTIVS X. Pont. Max. orbi Christiano indixerat, principio. Vidi enim solemni supplicationis ritu ad Basilicam Vaticanam procedentes numerosissimas infantium scholas, agmina

na Monachorum, & religiosorum hominum sodalitia; inde collegia diuersa Clericorum, & Ecclesiarum presbyteria. Clerum suum sequebatur Pontifex, veneranda Episcoporum corona circumfusus. Hunc populi Christiani Ducem, & Antistitem supremum immensa fidelium turba subsequebatur, eo animi ardore, vt cælum ipsum expugnaturi, manuq; violenta direpturi viderentur, homines plerique omnes sacco tantum & cilicio tecti, & scipione viatorio armati. Vbi in porticū ad limen Ecclesiæ peruentum, Pontifex in genua prouolutus, cum oratione super plebem data misericordiam diuinam implorasset; occlusas valuas non tam aperiens, quam diruens, primus templum ingreditur, rectaque pergit ad altare, preces solemnes inchoaturus. Interim non sine stupore spectauimus, quo impetu populus ille ingens in Ecclesiam irrueret, limina certatim exosculantes, genibusque perreptantes; templum ingressi pars in terram proni, totoque prostrati corpore, pars B. Petri, vt vocant, Confessioni, & altaribus prouoluti, lacrymas precesq; fundebant; & ad misericordiam Dei extorquen-

quendam non tam pectus palmis, quam  
cœlum ipsum inuidia tunderent. Hæc  
fateor noua tum visa mihi, cui nihil simile  
apud nostros antea obseruatum; vbi ho-  
mines ad orationem genuflexi non nisi in  
sepulcrorū memorijs picti sculptiue con-  
spiciuntur. Sed nouitas illa clarissimum  
antiquæ sanctitatis indiciū mihi præbuit:  
vnde Ecclesiam etiam nunc vitali vigore  
Spiritus sancti vegetari regique certo per-  
spicerem. Eaue in sententia magis con-  
firmatus sum, vbi populum illum agmine  
immenso, & continua serie cæteras Ec-  
clesias, precibus, stationibusq; præstitu-  
tas, obeuntem vidi; supplicationibus in-  
terim, & Litanijs suo quosque ordine, sed  
vno coniunctoque pietatis certamine di-  
uinam opem exposcentes. Tum vero per-  
spexi, quanta pietatis æmulatione pere-  
grini ad Urbem confluentes & publicis  
Ecclesiæ, & suæ quique nationis priuatis  
hospitijs excipiantur: ad hæc quo studio  
curaque foueantur ægroti, quod fidem  
propemodum omnem excedit.

In tanto populorum & nationum nume-  
ro facile perspexi, quid catholica Eccle-  
sia a sectis factionibusque priuatis distet:

cum



cum hic omnes gentes omnesque linguæ  
vnius fidei & caritatis vinculo sociantur;  
apud istos vnius eiusdemque ciuitatis po-  
pulus, sæpe etiam familiæ singulæ, opi-  
nionum & parietum diuertigio separatæ,  
suo quique in angulo Ecclesiam coarctatam  
exsistent, cæterosque vt extorres ac  
profanos ferali odio auersentur.

Christus Dominus omnes gentes, & ex-  
tremos terræ terminos hereditatem & pos-  
sessionem a Patre accepit. patrimonium  
hoc amplissimum integrum, nec minuen-  
dum vnquam, tabulis dotalibus sanguine  
suo obsignatis sponsæ vnicae contulit.  
Proinde mirandum, cum S. Augustino,  
qualem vesaniam patiantur hæretici, qui  
præcisi a compagine Ecclesiæ Christi, &  
partem tenentes, & totum amittentes, no-  
lunt communicare orbi terrarum, quo dif-  
fusa est gloria Christi; cui communicat  
catholica Ecclesia. Etenim Christianorū  
cum sint hæreses plures, atque omnes se ca-  
tholicos velint videri, aliosque præter se  
hæreticos nominant; vna est Ecclesia ca-  
tholica, cui hæreses aliæ diuersa nomina  
imponunt; cum ipsæ singulæ proprijs vo-  
cabulis, quæ negare non audeant, appel-  
len-



lentur. Huius igitur Ecclesiæ tenenda est nobis communicatio, quæ Catholica est, & Catholica nominatur, non solum a suis, sed etiam ab omnibus inimicis. Velint enim nolint ipsi quoque hæretici & schismaticum alumni, quando non cum suis, sed cum extraneis loquuntur, catholicam nihil aliud quam catholicam vocant. Non enim possunt intelligi, nisi hoc eam nomine discernant, quo ab vniuerso orbe nuncupatur. Hæc sola Ecclesia nos Deo seruat, hæc filios regno, quos generauit, assignat. quisquis ab ea segregatus adulteræ iungitur, a promissis Ecclesiæ separatur. Eius vnitatem, qui non tenet, Dei legem non tenet, non tenet Patris & Filij fidem, vitam non tenet & salutem. Quocirca, inquit, si tibi Angelus de cælo diceret: Dimitte Christianitatem orbis terræ, & tene partes Donati, (hoc est Lutheri vel Caluini), anathema esse deberet: quia te a toto præcidere, & in partē contrudere conaretur, & alienare a promissis Dei. Ecclesia sponsa Christi est, vt ait idē Augustinus, totum possidet quod a viro suo accepit in dote. Quæcunque congregatio cuiuslibet hæresis in angulo sedet,

con-

concubina est, non matrona. iactet se cum spuria prole contra Ecclesiam, & ancilla procax dominæ conuitia & iniurias ingerat; eijciatur tamen cum filiis suis, qui utcunque nunc Christi patrimonium sibi arrogent, hæredes cum filiis liberæ numquam erunt. Neque enim Deum Patrem habere potest, qui non habet Matrem Ecclesiam.

Et ne quis hanc Matrem fidelium, Arcam salutis, & Christi Tabernaculū ignorare posset, in Sole illud posuit, deditque in lucem gentium: atque ut Dei ciuitas conspicua appareret omnibus, in montis vertice eam eminere voluit. Quomodo enim gentes in tenebris & umbra mortis sedentes ad eam conuerterentur, si veritatis luce extincta errorum nox ipsam oppressisset; vel admota Diogenis laterna in angulis esset quærenda? Ecclesiarum origines euoluenti omnium sæculorū exempla occurrunt, quam fidei & religionis matricem & magistrā singulæ agnoscāt. Taceo Britanniam, quatenus Angli, Saxonesq; nostri eam occupant, S. Gregorij magni apostolatu per Augustinum sociosque Monachos Euangelij luce perfusam.

sam. Cogita Saxoniam nostram Cismarinam cum Prouincijs vicinis ad intimum Septentrionem porrectis, & extremam Thulen, S. Anscharij prædicatione Catholicæ Ecclesiæ adiectam. Cogita reliquam Transrhenanam Germaniam, quæ extra veteris Romani Imperij limitem fuit, Bonifatij, VVillebrordi, Suiberti, & V Vilhadi, aliorumq; sanctissimorum hominum labore, & industria ad catholicæ fidei agnitionem, & Ecclesiæ vniuersalis communionem perductam. Nunquid ea tunc inuisibilis latebat Ecclesia, quæ Apostolicos viros prædicationis munere legitime instructos eo misit? quæ recens fundatis ecclesijs Episcopos ordinauit? quæ ritus legesque ecclesiasticas, omnemque disciplinam sacram ijsdem tradidit? Si recentiora tempora spectemus, miraculo euidenti non caruit, quod auorum memoria de America, de vltima Africæ ora, & de Indiæ remotissimis Prouincijs Insulisq; factum scimus. Subtraxerat Ecclesiæ catholicæ veritatis hostis Prouincias & Regna, quæ ad Septentrionem vergunt, & vniuersalis Ecclesiæ membra non ita pridem nobilissima in partes sectasque varias discer-

discerpserrat; ita vt Christi patrimonium non exigua parte mutilatum videri posset: cum repente veritatis Sol, cui peruersum & obstinatum animum homines factiosi occluserant, Prouincijs quas dixi remotissimis, & dira barbarie effleratis exoritur, suoque lumine longe lateq; omnia perfundit: vbi nunc Regna, & Prouinciæ propemodum infinitæ Christi iugo colla submiserunt; & religio catholica per Metropoles, Episcopatus, Academiâs celeberrimas, & religiosorum hominum Collegia infinita, lætissima propagine diffusa floret. Quis vero nescit, quibus auspicijs, qua auctoritate, quorum opera & ministerio id factum? Neque enim ex latebris noui & incogniti prædicatores emerfere, quod auorum memoria apud nos contigisse scimus; sed Pontificum, Regumq; Catholicorum studio agmina operatorum ad nouam messem, ex Catholica Ecclesiæ gremio fuere submissa. Neq; nunc obscurum vlli est, vnde Missionarij ad fidei Catholicæ reliquias inter hæreticos & schismaticos tuendas, vel veritatem de integro apud infideles propagandam submittantur, qui omnium nationum

Col.

Collegia, non solum Romæ, sed per cæteras omnes Orbis Prouincias, etiam in Iaponia, sub primo Solis ortu à Pontificibus Romanis fundata non ignorat. Hoc Catholicæ Ecclesiæ studium, hanc Pontificum, hanc Cardinalium curam vel præcipuam hic esse sciunt, qui sine odio & inuidia res Romanas inspiciunt. Neque eam inanem esse nostro hoc tempore patitur Deus, quum non ita pridem certo nuntio ex Oriente perlatum sit, Sinarum Regem cum familia & nobilitate præcipua, Christi fidem suscepisse, Principumque exemplo myriades hominum passim ad baptismum properare: ita ut competentibus catechizandis vix omnes per Europam Sacerdotes, si committerentur, suffecturi videantur.

Denique Apostolicam eandem Ecclesiam symboli definitione profiteamur, eo quod originem, & successionem ab Apostolis continua serie deductam usque in finem seruet. Constat enim, inquit Tertullianus, quod Christus Iesus Dominus noster duodecim Apostolos, quos hæc appellatio missos interpretatur, lateri suo adlegerit, destinatos nationibus Magistros,

stros, ad Patrem regrediens iussit ire, & docere nationes tingendas in Patrem, & Filium, & Spiritum sanctum. Tum etiam quod Apostoli consecuti promissam virtutem Spiritus sancti ad virtutes & eloquium, primo per Iudæam contestata fide in Iesum Christum, & Ecclesijs institutis; dehinc in Orbem profecti, eandem doctrinam eiusdem fidei nationibus promulgauerunt; & proinde Ecclesias apud vnāquamque ciuitatem condiderunt: e quibus traduces fidei, & semina doctrinæ cæteræ exinde Ecclesiæ mutuata sunt, & quotidie mutantur; vt Ecclesiæ fiant, ac per hoc & ipsæ Apostolicæ deputantur, vt soboles Apostolicarum Ecclesiarum. Omne enim genus ad originē suam censeatur necesse est. Itaque tot ac tantæ Ecclesiæ vna est illa ab Apostolis prima, ex qua omnes; & sic omnes primæ, & omnes Apostolicæ, dum vnā omnes probant vnitatem. Constat proinde omnem doctrinam, quæ cum illis Ecclesijs Apostolicis, matricibus & originalibus fidei, conspirat, veritati deputandam; id sine dubio tenentem, quod Ecclesia ab Apostolis, Apostoli a Christo, Christus a Deo,

suscepit. Reliquam vero omnem doctrinam de mendacio præiudicandam, quæ sapiat contra veritatem Ecclesiarum, & Apostolorum, & Christi, & Dei. Hæc ille.

Vnde facile perspexi, Septentrionalem nostram Ecclesiā, quamdiu eam fidei doctrinam & ordinationem retinuit, quam S. Anschario prædicante ab Apostolica Sede susceperat, vere Catholicam, vere Apostolicam fuisse; quippe ab Apostolico viro fundata, cui petente Ludouico Pio, Gregorius IV. Sedis Apostolicæ Præsul ante Corpus & Confessionem S. Petri, publicam gentibus Septentrionalibus euangelizandi auctoritatē tribuerat. Sed cum post annos paulo minus DCC. eadē Pro-  
uinciæ per Lutheri emissarios, quorū præcipuus apud nos fuit Ioannes Pomeranus, in partem sectamque peculiarem pertraherentur; & noui isti prædicatores, veteri fide & disciplina partim abrogata, partim interpolata, Ecclesias Cathedrasque Episcoporum, qui vel exilio vel carcere mulctati decesserunt, inuaderent; & homines a seipsis orti, nouo more, sine Episcopali ordinatione collegas & successores sibi constituerent; dubium non est,



quin Apostolicæ successionis serie interrupta eadem Ecclesia ex Catholica & Apostolica in hæreticam Lutheranam conuersa fuerit: vti etiam Cisalbiana vestra, quã a Suiberto & V Vilhado Gregorij II. & Hadriani I. Apostolicorum Præsulum auctoritate fundatam, eadem pestis postea afflauit, & subuertit.

Dixi Ecclesias nostras Septentrionales Apostolicæ doctrinæ propaginem ex Romana accepisse, quam Apostolicam fuisse, atque etiam nunc esse, nemo vnquam sanus dubitauit: quinimo vt omnium Apostolicarum maxima & antiquissima, honoris prærogatiuam præcipuam semper obtinuit. Eius potentiorẽ principatũ statim post Apostolorum tempora agnouit Irenæus. Eam statu felicem pronunciat Tertullianus, cui totam doctrinam Apostoli cum sanguine profuderunt; atque inde Africanis quoque Ecclesijs suam auctoritatem præsto fuisse testatur; eo scilicet, quod doctrinam fidemq; ex ea acceperit, ideoq; vt Matrem & Magistram coluerit vniuersa Africa. Hanc Petri Cathedram atque Ecclesiam principalem; hanc Ecclesiæ Catholicæ radicem

& ma-



& matricem agnoscit Cyprianus. In ea semper Apostolicæ Cathedræ principatû viguisse affirmat Augustinus. Vnde vniuersa antiquitas hanc Sedem Apostolicam proprio & absoluto nomine semper appellauit, & Episcopo ipsius Domni Apostolici titulum peculiarem tribuit. Ex ea vnitas sacerdotalis exorta est, teste Cypriano: quia Christus, vt sanctus ille martyr loquitur, super vnum Petrum ædificat Ecclesiam suam, & illi pascendas mandat oues suas; & vt vnitatem manifestaret, vnam Cathedram constituit, & vnitatis eiusdem originem ab vno incipientem sua auctoritate disposuit. Et in pari consortio honoris & potestatis, præ cæteris Apostolis primatus Petro datur, vt vna Christi Ecclesia, & Cathedra vna monstretur.

Ob hunc primatum, siue potentio rem principalitatem Romanæ Sedis, necesse est ad eam omnem conuenire Ecclesiam; hoc est, eos qui sunt vndique fideles, vt iam olim pronuntiauit Irenæus: ita vt catholicus censerî nullo modo pōssit, qui eius Ecclesiæ communionem non fruitur. Hanc Petri vnitatem qui non tenet, inquit Cyprianus, tenere se fidem credit? qui

Cathedram Petri, super quam est Ecclesia fundata, deserit, in Ecclesia se esse confidit? Nec quenquam latere potest historiae ecclesiasticae paulo peritior, quam solite olim Orientalium Ecclesiarum Episcopi de statu suo periclitantes, Romanae Sedi fidem suam probare studuerint, eiusque exambierint communionem; ut Ecclesias, vel saluas retinerent, vel amissas recuperarent. Hanc primam Sedem ob eundem primatum nullius inferioris iudicio obnoxiam ceterae omnes iudicem supremam in causis ecclesiasticis agnouerunt. ad eam a Conciliorum vel collegarum sententijs prouocarunt; iniurijs pulsati eius poposcerunt auxilium, quod Petrus & Athanasius Alexandrinae, Meletius & Paulus Antiochenae, Paulus & Ioannes Chrysostomus CPlitanae Ecclesiae Patriarchae efficax & opportunum experti sunt. E contra Dioscorum Alexandrinum ideo ab vniuerso Chalcedonensi Concilio damnatum depositumque legimus, quod excommunicationis sententiam S. Leoni intentans, primam Sedem iniuria contumeliaque affecisset. Hunc primatum Christianissimi quique Imperatores agnouerunt.

Ideo-

Idcoque Theodosius maior Nectarij Patriarchæ CPni electionem, quamuis ab vniuersali Concilio Constpnō factam, a Sede Romana confirmari voluit; eique formatam a Damaso PP. regulariter dirigipoposcit, vt testatur Bonifatius PP. I. Eodem modo iunior Theodosius cum Proclum ex Cyzicena Ecclesia ad Constpnam transferri cuperet, prolatis Cælestini PP. I. litēris, quibus eam translationem pridem probarat, facile suo desiderio potitus est.

Sed cum tu nostro tempore Græcos Romanæ Sedis primatu iure offēdi existimes, mox Orientalis Ecclesiæ mentem accuratius peruestigatam explicabo: vnum interim addam; supremam semper fuisse Sedis Romanæ auctoritatem in conuocandis dirigendisque Episcoporum Concilijs, quibus vel ipsi Pontifices per se, vel per Legatos a latere missos, vel per dioecesium Primates, Vicarios suos, præsidebant; cuiusmodi Vicariatu per Illyricum Thessalonicensem, per Gallias Arelatensem, per Hispaniam Tarraconensem & Bracarensem olim functos fuisse; indubitata antiquitatis testimonijs constat. Quali etiam postea per Germaniam Bonifatius Moguntinus,



per Septentrionem Anſcharius, eiufque aliquandiu ſucceſſores; per Angliam Cantuarienſis, alibi alij ex veteri inſtituto ac priuilegio fungebantur. Nec minus abſoluta fuit Epiſcopi Romani in Conciliorũ decretis vel confirmandis vel reprobandis auctoritas; quod Conſtpni I. Ephesine, & Chalcedonenſis generalium Conciliorum Synodice ad Damafum, Coeleſtinum, & Leonem magnum perſpicue docent. Hæc qui in tanta ſacræ eruditionis luce vel negare, vel ſophiſmatum tenebris obſcuſcare auſit, ei vel iudicium, vel pudorẽ omnem deperiſſe dixerim. Quamuis tu Hildebrandicis dictatis hæc accenſere non verearis, & quaſi noua fidei dogmata ad catholicum nominis inuidiam exagites. Sed cum hac etiam parte a R. P. Ebermanno in Moguntinis diſputationibus ſatis tibi neruoſe reſponſum ſciam, hoc interim Catone contenti erimus.

Hæc, quam expoſui, rationum ſumma eſt, cur Romanam Eccleſiam pro Vna illa, Sancta, Catholica, & Apoſtolica agnouerim, quam fidei Symbolo profiteamur; & cur eius gremio atque communioni tuto me commiſerim. Vnde vice verſa om-

nes extra eam Congregationes, quocunq;  
demum reformationis nomine glorientur,  
aut quacunque puritatis specie sibi blandi-  
antur, vt hæreticorum latibula detestor:  
eaque vt nullum nunc cum catholica Ec-  
clesia in terris militante, ita neq; in poste-  
rùm cum triumphante in cælorum regno  
partem habitura certissime credo.

Verumenimvero illud vehementer mi-  
ror, quod cum hoc ad Ecclesiam catholi-  
cam accessu omnibus eius per vniuersum  
Orbem membris me coniunxerim, tu con-  
tra ab ijsdem me separatum existimes: ea-  
que in re quam rationem sequaris, me non  
satis perspicere ingenue fateor. Nisi quod  
tu Ecclesiam ex diuersis Sectarum factio-  
nibus ita vnum in corpus conglutinatam  
existimas, vt quamuis omnes catholicæ e-  
diametro aduersentur, inter se tamen oc-  
culto aliquo symbolo aut sympathia arca-  
na, ipso scilicet catholicæ veritatis odio,  
ita sint colligatæ, vt qui vnam neget, om-  
nes neget. Sed cum purus putus Luthera-  
nismus, tua quidem opinione, angustissi-  
mis limitibus contineatur, vna scilicet &  
altera Saxoniz nostræ præfectura; quotam  
quæso ille Orbis partem occupat, vt cum

Catholicorum regionibus, Italia, Gallia, Hispania, Polonia, Germaniæ & Belgij parte maxima, tum vero cum America, India Orientali, & latissimis Africae Regnis, denique cum Græcia, & Oriente, quarum maxima pars in catholica communione etiam hodie persistit, comparari queat?

Neque vero cum Lutheranismò caritatem & tolerantiam Christianam simul iuravi, ut tu suspicari videris; eo quod cum Sectæ omnes mutuo se scabant ferantque inuicem, soli Catholici cæteros omnes diuersa sentientes anathemate defigant. Non ego Augustanam Confessionem hic tibi opponam, ubi fere omnium articulorum epiphonema est: Et damnamus secus sentientes: hoc dicam; cum nulla sit communicatio lucis cum tenebris, Christi cum Belial; cur veritatem catholicam amplexus hæreticorum oppositionibus contra vniuersalia, hoc est, ab omnibus, semper, & ubique credita dogmata, anathema dicere verear? Paulus fidem Galatis semel traditam non alio munimento securam præstari posse existimabat, quam ut aliter docentibus anathema intentaret; idque  
non

non solum quibusq; de vulgo præconibus, sed etiam Apostolis, & Angelis ipsis. Ecclesia hortus ille est conclusus, ex Canticis, ad quem hæresi aditus non patet. hæc vinea euangelica, quam Dominus ab operarijs probe excultam, plantisque fructiferis confitam, ad fures ferasque siluestres arcendas sepe circumdedit. Et tu miraris, si maceriem illam sartam tectam conservare omni ope studeat, si dirui perfodique prohibeat is, quem vineæ suæ Dominus suprema cum auctoritate præposuit? Profecto ut erroris in se, ita iniquitatis in nos rei sunt, qui cum terminos a Patribus constitutos pro libitu mouere, limites confundere, fines exarare, siluam non suam cedere, in alienam messem falcem immittere, peruerso & pertinaci animo palam audeant; vim sibi & iniuriam fieri queruntur, si alieno prohibeantur, si iuris violati postulentur.

Sed tu intra Symboli articulos catholicæ veritatis terminos stare existimas. quæ illo expresse definita non sunt, nullam certam credendi legem, sed promiscuam habere sentiendi licentiã; quæ nouis Ecclesiæ definitionibus constringi coarcta-



riq; non debeat. Sed minime nouum hoc aut insolens effugium. Nestorius cum temeritate veritatis catholicæ accusaretur, fidei Symbolum obtendebat, quod *Θιστόκη* vocem non agnosceret; illud se profiteri aiebat. Sed Cyrillus id satis esse negat. nam etsi Symbolum voce tenus profiteri videretur, non tamen recte illud ipsum intelligere, neque sincere, sed peruerse & præpostere interpretari. Ideoque necessum esse, vt ea omnia scriptis execraretur, & anathematizaret, & publice abiuraret, quæ scelestæ, & profanæ hactenus ipse senserat, aliosque docuerat: eumq; in finem duodecim anathematismos eidem præscribit, quibus errorem suum execraretur. Hisce anathematismis Cyrilli non solum Nestorius alios XII. e diametro pugnantes opposuit; sed Ioannes Antiochenus cum affectis eisdem vt hæretica impietate refertos damnauit. Theodoretus quoque & suo & Orientalium Episcoporum nomine, contradictionibus totidem impugnauit. Stetit tamen immobilis catholica veritas, & Cyrilli anathematismos eidem stabiliendæ scriptos, vniuersa Dei Ecclesia approbavit, vtcunque principio noui durique multis viderentur.

Hoc



Hoc vnum namque, vt Vincentius Lirinensis iam olim dixit, omni industria semper studuit Ecclesia catholica, vt vetera fideliter sapienterque, si qua sunt illa antiquitus informata & inchoata, accuret & poliat; si qua iam expressa & enucleata, consolidet & firmet; si qua iam confirmata & definita, custodiat. Imitatur enim animarum religio rationem corporum; quæ licet annorum processu numeros suose euoluant & explicent, eadem tamen quæ erant permanent. Easdem profectum leges Christianæ religionis doctrina sequitur, vt annis scilicet consolidetur, dilatetur tempore, sublimetur ætate; incorrupta tamen illibataque permaneat. cum nihil propterea in dogmatibus permutationis admittat; nulla proprietatis dispendia, nullam sustineat definitionis varietatem. Fas est enim, vt prisca illa cælestis Philosophiæ dogmata processu temporis excurentur, limitentur, poliantur; sed nefas est vt commutentur, nefas vt detruncentur, vt mutilentur. Accipiant licet euidenciam, lucem, distinctionem; sed retineant necesse est plenitudinem, integritatem, proprietatem. Nullius ergo

no-

nouitatis infimulanda est Ecclesia, sedula  
& cauta depositorum apud se dogmatum  
custos, si subinde hæreticorum nouitati-  
bus excitata, Conciliorum nouis strictio-  
ribusq; decretis veteris fidem asserere, &  
a corruptelis vindicare enisa fuerit, etiam  
sub anathematis denuntiatione. Quo il-  
lud tantum perfecit, vt quod antea sim-  
pliciter credebatur, postea crederetur di-  
ligentius: quod antea lentius prædica-  
tur, hoc idem postea instantius prædica-  
retur: & quod ipsa prius a maioribus sola  
traditione acceperat, hoc deinde posteris  
etiam per scripturæ chirographum consi-  
gnaret. Neque vero hæreticorum hic cu-  
randa est oblocutio, neque eorum in gra-  
tiam vel apex vnus de rectis fidei decretis  
demendus vel mutandus. Nam si semel  
admissa fuerit hæc licentia, quis non videt,  
quantum exscindendæ atq; abolendæ re-  
ligionis periculum consequatur? Abdica-  
ta enim qualibet parte catholici dogma-  
tis, aliæ quoque atq; item aliæ partes iam  
quasi ex more & licito abdicabuntur; ita  
vt nihil posthac apud Ecclesiam relinqua-  
tur intactum, nihil illibatum, nihil inte-  
grum. Hæc auctoris tibi notissimi sensu

ver-

verbisque paulo prolixius exposui, quia plane ad rem nostram faciunt. Nolles enim Lutheranis omnem pro libitu sentiendi licentiam strictis illis Concilij Tridentini decretis ademptam, in multis fidei dogmatibus, quæ cum eorum confessione vel hypotyposi non congruunt. Sed idem reliqui omnes Sectarij conqueretur. Omnibus ergo ex æquo gratificandū erat? ficcine vero sacrum illud fidei depositum integrum illæsumque posteris seruaretur?

Sane nullam maiorem Tridentinis Patribus curam fuisse scio, quam vt omnia ipsorum decreta ad primitiæ antiquitatis sententiam exactissime conformarentur. quod quamuis te contra Veneti sannionis & Spalatensis Apostatæ opinionem ægre crediturum sciam; crederes tamen, si Gulielmi Sirleti, tunc Vaticanæ Bibliothecæ Præfecti, epistolarum volumina mecum hic inspexisses; quibus ille singulis fere septimanis ad Marcellum Ceruinum, Seripandum, aliosq; Concilij præsides Cardinales prolixè perscribebat, quæcumq; de singulis fidei capitibus ex SS. Patrum, præsertim Græcorum operibus, tunc maximam partem ineditis, diurno nocturnoq;  
stu-

studio colligere poterat : eaq; opera præcipue purpuræ dignitatem meruit . Et sane præclara est , & in publicum proferri operæ pretium foret : appareret enim omnibus perspicue , quam diuersos totoque cælo distantes polos spectarint Augustanæ confessionis Concordiæque auctores , atq; ex aduerso Tridentini Patres auitæ fidei defensores . Nanque hic , solam cælestis veritatis cynosuram respiciens ,

--- *semper sublimis ; at illum*

*Sub pedibus nox atra videt , manesq; profundi .*

Sane qui tuas aduersus catholicam fidem disputationes recte expendunt , eandem plane litem Ecclesiæ te mouere facile perspiciunt , qua Pyrrhonij dogmaticos olim exercuerunt . Nam sceptici , vt acatelepsiam & epochen suam tuerentur , etiam certissima sapientum decreta vocabant in dubium , adeoque omnia indefinita & incomprehensibilia pronuntiabant . neque enim magis hoc , quam illud esse ; & omni rationi rationem æqualem opponi posse existimabant . Eodem modo cum sacra antiquitate agis . nulla tam clara & certa sunt SS. Patrum dogmata , nulla tam sancta

et Conciliorum decreta, quæ non conuellantur ratiunculis vel ex dubio aliquo, vel male intellecto, aut perperam explicato loco deductis. Ita nunc omnis veterum Theologia mera tibi scepſis eſt; adeoque largiter peccaſſe putas Eccleſiam, quæ accepta a Patribus dogmata, ab hæreticorum peruicacia anathematis denunciatione vindicanda cenſuerit; in quibus ſcilicet leuia & exigui momenti permulta tibi videntur, quæ vtrum credas, aut non credas, vel quo pacto credas, parū interſit.

In his primo loco ponis Purgatorium, cuius non ſolum res, ſed & nomen ipſum noſtros homines vehementer offendit; ideoque non minores ob ſublatus Purgatorium Luthero gratias ſe debere exiſtimant, quam Lucretius Epicuro ſuo,

--- qui, cum vita iaceret

*In terris oppreſſa graui ſub relligione,*

*Primū Grauius homo mortales tollere contra*

*Eſt oculos auſus, primuſq; obſiſtere contra.*

Docuitque ſuos aſſeclas,

*Vt metus ille ſoras præcepſit Acherōtis agendas*

*Funditus, humanā qui vitam turbat ab imo.*

Sed vtcunque illis explodendum videatur hoc dogma, certum eſt, antiquiſſimum

& vniuersale semper fuisse in primitiua Ecclesia; ideoque non sine ratione Concilium anathemate id stabiliendum duxit: cum triplici ex capite veritas eius asseratur. Primo ex sacris literis, Matth. 5. vbi carceris nomine appellatur, in quo satisfiat vsque ad nouissimum quadrantem; tum prima ad Corinthios 3. vbi quosdam ita saluos futuros scribit Apostolus, quasi per ignem. Nititur deinde auctoritate præcipuorum Doctorum Ecclesiæ tam Græcæ, quam Latinæ, qui prædicta loca Scripturæ vnanimi consensu de Purgatorio sunt interpretati. In Græcis agmen ducunt S. Basilius, ad caput 9. Isaïæ hac de re prolixè agens; & libro de Spiritu S. ad Amphilochium c. 15. Gregorius Nazianzenus & Nyssenus in diuersis orationibus. Basilius Seleuc. orat. 4. de Dauide. Isidorus Pelus. lib. 5. epist. 350. & Ioannes Chrysostomus tom. 6. serm. pro defunctis, hom. 21. in Acta, & hom. 3. in epist. ad Philippenses: quæ loca Io. Matthæus Caryophilus Iconiensis Antistes Zachariæ Gergani græculi nugis erudite opponit. Cum Doctoribus Græcis paria faciunt Latini. S. Ambrosius in locum Apostoli

1. Cor.

1. Cor. 3. & Hieronymus in 4. cap. Amos. Augustini autem loca omnia vel obiter indicare prolixum foret: cum neminem antiquorum plura, vel claria hac de re scripsisse constet, vt vnus instar omnium esse possit. Tertia ratio est analogia fidei, & sensus perpetuus vniuersæ Ecclesiæ in precibus & oblationibus incruenti sacrificij pro defunctis offerendis; quod & ipse aliquoties te affirmantem audiui, hæc autem vana & irrita essent, nisi animas tali in statu & loco commorari credidisset antiquitas, vbi Ecclesiæ suffragijs subleuari possent. Tum etiam in veteris poenitentiae disciplina idem Ecclesiæ sensus elucet, quæ vindictam peccati ne ijs quidem, qui in extremo vitæ discrimine reconciliabantur, indulgentiam censuit; sed sanitati restitutos, Deo & fidelium societati poenitentiae squalore satisfacere voluit. Ab hac igitur perpetua vniuersæ antiquitatis sententia cur nunc demum Ecclesia recedat, vel hæreticorum proteruiæ proculcandum relinquat dogma omniū Doctorum auctoritate stabilitum? Concilium veritatem catholicam caute & prudenter decreto suo contra fidei subuersores asseruit: simulque malas artes eorum, qui ex



pietate quæstum faciunt, & populi simplicitati illudunt, proscripsit: ita ut quid ab homine Christiano veritatis, ac pietatis amante, tam in ipso dogmate, quam Concilij decreto desiderari possit, non videā; modo nouitatis & partium studium animus non præpediatur.

Eadem leuitate anathema infligi putas ijs, qui septem Sacramenta non confitentur. Sed dic fodes, cur Ecclesia catholica non damnet eos, qui duobus solis utcumq; retentis, cætera quinque vel expungunt, vel Sacramentorum nomine indigna existimant? Tu negare non potes, Latinos pariter & Græcos septenarium numerum agnouisse a quinque retro seculis. Vnde autem hanc sententiam utrique Ecclesiæ subortam existimas eo tempore, quo Græcorum schisma aduersus Latinos maxime feruebat? Quis eos nullas non dissidiorum causas aucupantes hac in parte Latinis tum coniunxit? Vnde hanc utriusq; Ecclesiæ obseruationem non nisi ex primitiua & Apostolica traditione acceptam, & perpetuo usu ad nostra usque tempora derivatam esse necessario sequitur. Neq; opus est, ut prolixius agam post eruditissimum, laudatissimumq; opus Petri Arcudij Lute-  
tiæ



tiae editum, quo consensus Græcæ Ecclesiæ cum Latina tam solide ostenditur, vt nemo hætenus, quod sciam, contra hiscere ausus fuerit. Si ergo Angelo de cælis, nouum quid præter semel ab Apostolis tradita prædicanti, anathema intentet ipse Paulus; cur nos tam profane in Ecclesiæ Sacramenta grassantes anathemati subijcere dubitemus? Præcipua hæc diuinæ gratiæ instrumenta vniuersa Dei Ecclesia semper agnouit, semper exercuit: & nunc demum post quatuordecim seculorum vsum ea nouatoribus tollere & proculcare impune licebit? Nam vt firmissimum illum etiam nostro seculo vtriusque Ecclesiæ consensum taceam; sane Confirmationis, Pœnitentiæ, Ordinis, cæteraque Sacramenta tam perspicue & cōstanter proxima Apostolorum temporibus Ecclesia credidit & exercuit, vt nostro demum seculo sine manifesto impietatis crimine abrogari, negari, & violari non potuerint. Mihi controuersias post tot eruditos Theologos retexere, animus non est: id breuiter ostendam, nullo modo me reprehendendum, quod antiquitatis sententiam perpetuam nouis dogmatibus prætulerim.

Confirmationis Sacramentum ab Apostolis traditum omnis antiquitas semper & vbique tenuit: contra Nouatiani id negantes & negligentes, omnium calculo sine vlla controuersia & exceptione, nouatores & hæretici habiti. Quæro ego, si tum receptissimum per omnem Ecclesiam Sacramentum fuit, cur nunc vt figmentum nullo veritatis fundamento nixum expungitur? Et si Nouatiani id explodentes olim omniū calculo fuerunt hæretici, quomodo Lutherus, Calvinus, cæteri; sectarum patroni nunc eundem errorē errantes, ab hæresi immunes? Ad hæc; si olim Ecclesia vniuersa Nouatianos iure damnavit ob violatum, aut neglectum hoc Sacramentum, ideoque non nisi Chrismate confirmatos ad communionem eos recipi voluit; cur hodie temerariæ leuitatis notam meretur, si nouatores idem Sacramentum exhibilantes anathemate defigat? Proinde miror qui nam tu contra Moguntinos §. 108. ferreæ frontis hominem pronunciare audeas, qui dixerit; siue ex scriptura, siue ex consensu antiquitatis demonstrari posse, Sacramentum Confirmationis, quali nunc Ecclesia Catholica utitur,

tur, a Christo institutum esse. Ego vero non sine manifesta impietate in dubium vocari existimo, quin Apostoli, quod ipsi fecerunt, quodque vniuersæ Ecclesiæ faciendum tradiderunt, a Christo Magistro acceperint. Cum ergo vniuersa Ecclesia inde a principio Cōfirmationis Sacramētum ab Apostolorum instituto se accepisset, & eorundem exemplo exercuisse fateatur; indubie sequitur, Confirmationem illam a Christo per Apostolos institutam, non postea subintroductam fuisse. Ab ipsis autē Apostolis Ecclesiæ traditū fuisse euentissime patet. Etenim Clemens Alexandrinus libro, *Quis diues saluandus*, apud Eusebium hist. eccl. lib. 6. c. 35. & ipse liber Clementis sub falso Origenis nomine non ita pridem a Gillerio editus, iuuenem quendam a Ioanne Euangelista Episcopo cuidam Asiatico commendatum commemorat; cui baptismo illuminato Episcopus signaculum Domini, vt perfectam tutelam, contulit. Quo loco Baptismum & Chrisma, vt diuersa Sacramenta a Clemente poni, ex simili loco Stromat. lib. 2. certissimo apparet. Hinc Clementis discipulus Origenes ad Rom. 6.

Baptismum & Chrisma conferri scribit, secundum typum Ecclesiæ traditū: & Cornelius PP. apud Eusebium l. 6. c. 35. No-  
 uatum, cum in morbo baptizatus esset,  
 postea consecutum negat cum cætera,  
 quæ Baptismum sequuntur, καὶ τὸν τῆς Ἐκ-  
 κλησίας κανόνα, hoc est, iuxta Ecclesiæ ca-  
 nonem, tum Episcopalem oblationem.  
 Dicquæso, a quo typum, vel canonem il-  
 lum, seu regulam Ecclesiæ traditam pu-  
 tas, nisi ab ipsis Apostolis? Sane Cypria-  
 nus Carthaginensis Episcopus in Africa,  
 eodem tēpore ab Apostolis deducit, quod  
 baptizati Ecclesiarum Præpositis confir-  
 mandi offerebantur: vt per nostram, in-  
 quit, ordinationem, & manus impositio-  
 nem, Spiritum sanctum consequantur, &  
 signaculo Domini consummentur. Cy-  
 priani mente & verbis loquitur Augusti-  
 nus lib. 15. de Trinit. c. 26. Nemo disci-  
 pulorum dabat Spiritum sanctum; ora-  
 bant quippe, vt in eos veniret, quibus ma-  
 nus imponebant; non ipsi eum dabant:  
 quem morem in suis Præpositis etiā nunc  
 seruat Ecclesia. Nec minus perspicue S.  
 Hieronymus dial. contra Luciferianum  
 cap. 4. Quod si hoc loco quæris, inquit,  
 qua-

quare in Ecclesia baptizatus, nisi per manus Episcopi non accipiat Spiritum sanctum? disce, hanc observationem ex ea auctoritate descendere, quod post ascensum Domini, Spiritus sanctus ad Apostolos descendit. Cui deinde locum ex Actuum c. 8. subiungit: quo etiam Innocentius I. celebri illa epistola ad Decentium Eugubinum utitur, ut recens baptizatorum obsecrationem solis Episcopis permissam doceat. Nunquid tot talesque viri ferreæ tibi frontis videntur?

Sed quod tu frustra Apostolicam illam & miraculosam manuum impositionem allegari existimas ad hodiernam, ut ais, Pontificiam confirmationem, eo non minus iniurius es in secula primitiua, & omnes quos laudaui Ecclesiæ Doctores, quam in hodiernam Romanā Ecclesiam: cum iam illo tempore visibilis ista & miraculosa donorum effusio cessauerit. Ideoque vnus Augustinus reliquorum nomine tibi respondeat, tract. 6. in epist. S. Ioannis: Nunquid modo, quibus imponitur manus, ut accipiant Spiritum sanctum, hoc expectatur, ut linguis loquantur? aut quando imposuimus manum istis infantibus,

bus, attendit vnusquisq; vestrum, vtrum linguis loquantur? & cum videret eos linguis non loqui, ita peruerso corde aliquis vestrum fuit, vt diceret, non acceperunt Spiritum sanctum? Vides hanc peruersi cordis assertionem a S. Augustino iam olim explosam, cuius tempore miracula illa non minus, quam nunc cessarant. Neque tamen Confirmationis Sacramentum ideo de Ecclesia tollendum censuit, quod nouatores postea fecerunt.

Eo autem rerum catholicarum plane te imperitum ostendis, quod nullam prorsus manus impositionem in hodiernæ confirmationis Sacramento adhiberi affirmare non verearis. Ecclesia catholica nihil ab antiquo ritu mutauit, qualem S. Gregorij Magni Sacramentorum liber iam olim descripsit, eundem Pontificale Romanum totidem verbis nunc retinet; scilicet, vbi confirmandi ad Episcopum perducti coram eo in genua procumbunt, ibi leuata manu sua super capita omnium dicit: Omnipotens sempiterne Deus, &c. emitte in eos septiformem Spiritum tuum sanctum, &c. Eandemq; orationem Ambrosius lib. 3. de Sacramentis cap. 2. iam suo  
tem-

tempore in Confirmatione adhiberi solitam docet. Unde manifestissime apparet, quam tu frustra inter veterem, & hodiernam Confirmationem, tum etiam inter diuersarum Ecclesiarum ritus discrimen fingas, quæ viris doctis in ecclesiastica antiquitate probe versatis non nisi commiserationem exprimunt.

Sed cum omnia persequi, neque huius loci, neque mei sit institutum, addo quod in hac quæstione præcipuum & palmarium est. Tu Confirmationem meram cærimoniam, eamque liberam & indifferentem Baptismo olim coniunctam fuisse affirmas: è contra veteres omnes Sacramentum hoc a Baptismo diuersum existimant, & Sacramenti nomine passim appellant. Atque ita longo temporum decursu, vsuq; perpetuo, a maioribus accepit, atque hodie etiam credit non solum Latina, sed & Græca Ecclesia. Tu, ubi commodum fuerit, tuæ opinionis argumenta ex antiquitate propones: ego interim pro mea, hoc est, catholica sententia, aliquot indubitata veterum testimonia afferam, quæ nullis offucijs offuscarî possunt. Tertullianus diabolum Christo  
Chri-



Christo etiam de Sacramentis æmulatum scribit, præscript. c. 40. quo loco præter Baptismum, & Eucharistiam, Pœnitentiam quoque, & obsignationem Chrismatis; item Ordinem, & Matrimonium disertissime Sacramentorum Christi nomine ac numero complectitur; vt & lib. 1. aduersus Marcionem, c. 14. præcipue autem lib. 1. aduersus Praxeam c. 5. Vnctionis Sacramentum diserte appellat. Cum Magistro sentit & loquitur Cyprianus ep. 72. vbi hæreticorum rebaptismum propugnans ait, parum esse ijs manus imponi, ad accipiendum Spiritum sanctum; sed tunc demum plene sanctificari, si Sacramento vtroque nascantur. Sic Episcopi Concilij Africani apud eundem Cyprianum ep. 70. constituunt; De errore & prauitate venientis dandam per omnia diuinæ gratiæ Sacramenta, vnitatis & fidei veritatem. Quibus locis Confirmationis Sacramentum expresse non solum a Baptismo distinguitur, sed eidem opponitur. S. Augustini loca multa & clarissima habentur de eodem Sacramento Chrismatis, ex quibus perspicue patet eum non cærimoniam indifferentem, vt tu ais, sed verum

rum & peculiare Sacramentum Confirmationem existimasse. quæ lib. 2. contra Petilianum, comment. in Psal. 26. & tract. in epistol. Ioannis 3. & 6. videri possunt. His duos addam antiquissimos grauissimosque Scriptores, Cyrillum Hierosolymitanum, & S. Ambrosium, vterque Ecclesiæ Sacramenta initiandis necessaria explicans, peculiari sermone de Baptismo, & alio peculiari de spirituali signaculo, quo post fontem confertur perfectio, vt de diuersis Sacramentis, agit: vt ex illius catechesi mystagogica 2. & 3. huius Sacramentorum libro 3. apparet. Neque enim pura puta cæremonia, & Baptismi appendicula, vt tu vis, specialem catechesin merebatur.

Præterea si Confirmationis Sacramentum hæreticis ad Ecclesiam reuersis Spiritus sancti gratiam confert, quam ex Baptismo mere formali extra Ecclesiam, quippe obicem diuinæ gratiæ ponentes, accipere non potuerant; mera illa secundum te cæremonia efficacior erit, potiorque ad salutem, ipso Sacramento Baptismi; atq; ita Sacramenti defectus non validiori Sacramento, sed nudæ cæremoniae

niæ accessu emendabitur; quod quam sit absurdum, & quam omni doctrinæ & disciplinæ ecclesiasticæ contrarium, quis non videt? Omitto Africanam, & Cappadociæ, vicinasq; Ecclesias; quæ, vt dixi, non solo Confirmationis Sacramento, verum iteratione Baptismi prioris vitium corrigendum pertendebant; sed catholicam reliqui totius Orbis sententiã a Concilijs Patribusq; expositam propono. Cyprianus partem catholicam suo argumento sic premit, epist. 76. Qui Hæreticis, siue Schismaticis patrocinantur, respondeant nobis, habèantne Spiritum sanctum Hæretici, an non habeant? Si habeant, cur illic baptizatis, quãdo ad nos veniunt, manus imponitur ad accipiendum Spiritum sanctum? sed quia non habent, ideo apud nos manus imponitur, vt hic accipiant. Hinc can. 7. Laodicens, Nouatianos eiurata hæresi catholicè instructos sancto Chrismate inungi, & sic ad sancti mysterij cõunionem admitti constituit. Sic Basilius Magnus celebri illa epistola canonica ad Amphilochem, probans Laodicensi Concilij sententiam contra Cappadocès, de Nouatianis conuersis statu-

tuen-

tuendum ait, vt qui ab ipsorum Baptismo accedunt ad Ecclesiam, vngantur a fidelibus. Eamque Laodicensæ Synodi, & Basilij sententiam confirmauit paulo post Concilium Constantinopolitanum 1. can. 7. quo etiam obsignandi & vngendi formula Græcis hodie vsitata præscribitur. Neque aliter canonem illum intellexerunt, explicaruntq; Romanæ Ecclesiæ Præsules Concilio illi suppare. Siricius ad Himerium Tarrac. Arianos, inquit, nos cum Nouatianis, alijsq; Hæreticis, sicut est in Synodo constitutum, per inuocationem septiformis Spiritus Episcopalis manus impositione, Catholicorum conuentui sociamus; quod etiam totus Oriens, Occidensq; custodit. Similia habet Innocentius I. epist. 2. Sed omnium clarissime Leo Magnus loquitur epist. 85. Qui baptismum ab Hæreticis acceperunt, sola inuocatione Spiritus sancti per impositionem manuum confirmandi sunt; quia formam tantum Baptismi sine sanctificationis virtute sumperunt. Hæc de Confirmationis Sacramento intelligenda quis dubitet? quo etiam nunc Ecclesia Catholica ab hæresi venientes veteri more suscipit. Veteri,  
in-

inquam, more, idque non nisi per manum  
Episcopi. Nam vt epilogus Concilij Ro-  
mani habet tom. 1. Conc. Colon. pag. 255.  
iam ante dictos Pontifices Siluester Papa  
constituerat, vt Presbyterum Arianum  
nemo susciperet, nisi Episcopus eiusdem  
loci eum reconciliaret, & sacrosancto  
Chrismate per Episcopalis manus imposi-  
tionem sancti Spiritus gratia, quæ ab Hæ-  
reticis dari non potest, confirmaret.  
Concilio Romano accedunt Gallicana.  
Arausicanæ Synodo can. 1. Hæreticos in  
mortis discrimine positos, si Catholici es-  
se desiderant, si desit Episcopus, a Pre-  
sbyteris cum Chrismate & benedictione  
consignari placuit. Sic Concilium Epa-  
nense can. 16. Presbyteros, inquit, pro-  
pter salutem animarum desperatis & de-  
cumbentibus Hæreticis, si conuersionem  
subitam petant, Chrismate permittimus  
subuenire; quod omnes conuersuri, si sa-  
ni sunt, ab Episcopo nouerint expeten-  
dum. Vides Confirmationis Sacramen-  
tum Presbyteris, tantum in articulo ne-  
cessitatis, propter salutem animarum ab  
Episcopis olim permissum fuisse. Nam  
extra vrgentissimam necessitatem, per

impositionem manus fidelibus baptizatis, vel conuersis ex hæresi, Spiritum sanctum tradere, Episcopis tantum licet, vt habet Concilium Hispa . 2. can. 7. Idemque supra Cypriani & Augustini testimonio probatum est . Et tu post Apostolorum exempla, post vniuersalem totius primitiue Ecclesiæ doctrinam & praxin, Sacramentum, quo illa animarum salutem conferri censuit, in cæremoniam arbitrariam & indifferentem, sine iusta Ecclesiæ censura mutari posse existimas?

Hæc de Confirmatione Sacramento-  
rū numero asserenda paulo prolixius scripsi, vt videas quam bene ex antiquitate, sine ferreæ frontis aut plumbei cordis nota, se tueatur catholica Ecclesia, etiam vbi tu pessima causa eam niti existimas.

Multo igitur facilius reliquis Sacramenti nomen vendicatur, quorum quædam ita sunt perspicua, vbi ipsi sectæ vestræ auctores in Sacramentorum numero ea habuerint. Quod de Poenitentia fecisse constat Melanchthonem Apologiæ Confessionis Augustanæ cap. 13. & ipsum Lutherū contra triginta duos Louaniensium articulos; tum vero catechismus minor, qui



puerulis apud nos ediscendus proponitur, idem testatur: vbi inter articulum de Baptismo & Eucharistia, caput de Clauium potestate interiectum fuit. Si ergo Pœnitentia vere est Sacramentum, habens mandatum Dei & promissionem gratiæ, vt Apologia dicto loco ait, eandemq; ob causam Lutherus eam Sacramentum libenter confitetur; peccant sane eius affeclæ, qui Ecclesiam catholicam eo nomine sugillant, quod non confitentes anathemate feriat.

Matrimonium quoque tacito quodam consensu Lutherani in Sacramentorum numero habent, dum perpetuo sacrū coniugij statum appellant. Et cur Sacramentum post Paulum Apostolum credere & vocare dubitet Ecclesia? Sane omnium temporum Patres & Doctores frequentissime ita appellant, quod vnus Augustini locis fere innumeris ostendi potest, præsertim ex libro de bono coniugali; vt Tertullianum lib. contra Marcionem c. 18. aliquoties Sacramenti nomen Matrimonio tribuentem, aliosque taceam.

De Sacramento Ordinis sectarum auctores Lutherus, Melanchthon, & Calvinus

iti-



itidem discrepant. Ille enim cum sectatoribus Illyrico & Chemnitio, Sacramentum esse mordicus negat; duo autem posteriores in Sacramentorum numero habendum ostendunt. Ea scilicet vis est catholicæ veritatis, ut aduersariorum oculos quamuis nictitantes penetret, suaque luce percellat. Nam ab ipsis Apostolis institutam, passimque vsitatam, ut plurima sacre Scripturæ loca testantur, vniuersa Dei Ecclesia suscepit, & pro vero atque indubitato Sacramento semper habuit Ordinationem, quæ fit per orationes, & manus impositionem ab Episcopis, quos in Apostolorum locum successisse constat. Augustinus suo tempore neminem dubitasse affirmat, quin Ordo æque Sacramentum esset atque Baptismus, dum ait lib. 2. contra Parmenianum cap. 19. Ipsi explicent, quomodo Sacramentum baptizati non possit amitti, & Sacramentum ordinati possit amitti. Si enim vtrunque Sacramentum est, quod nemo dubitat, cur illud non amittitur, & illud amittitur? neutri Sacramento iniuria facienda est. Sol mero meridie clarior non est hoc Augustini testimonio, cui nullæ hæretico-

rum strophæ tenebras vnquam offundent. Sic Leo magnus epist. 81. magna deuotione curandum monet, ne tantæ benedictionis Sacramentum negligenter videatur impletum. Idem epist. 87. contra digamorum ordinationes inuehens; Quis ergo, inquit, dissimulare audeat, quod in tanti Sacramenti perpetratur iniuriâ? His accedit S. Hieronymus, Vigilantium eiusque affeclas exagitans his verbis: Nisi prægnantes Clericorum viderint vxores, Christi Sacramenta non tribuunt. hoc est, vt eadem epistola loquitur, Christi ministerio arbitrantur indignos. Vnde eum Ordinationem Sacramenti nomine intelligere dubium nullum est. Adderem S. Gregorij Magni locum, omnium hac de re clarissimum, in 4. Regum cap. 5. nisi ille ob tenebras eius tempore Ecclesiæ iam offundi cæptas, vt vos quidem dicitis, intestabilis vobis haberetur, qui vix primam & purissimam audis antiquitatem. Certo credo me tam præclaris auctoribus nixum multo rectius Ordinis Sacramentum cum catholica Ecclesia admittere; quam tu cum Luthero eiusque affeclis, omnis antiquitatis hostibus, idem neges.

De

De Extrema vnctione habemus Iacobi Apostoli præceptum: habemus doctrinam & vsum perpetuū veteris Ecclesiæ; quam S. Anscharius Septentrionis Apostolus cum catholica fide nostris quoque Provincijs intulit, vt ex eius vita Coloniae nuper edita constat. Tu veniam dabis, si antiquitati fidem potius quam tibi tanta in re tribuam, & de Sacramentorum numero Ecclesiæ iudicium tuo præferam.

Tertio dicam impingis Ecclesiæ Romanæ, quod Ioannis & Christi baptismum confundentes anathemate defigat. Sed quid peccauit Concilium Tridentinum, si fidei depositum fideliter custodit, & catholicum, hoc est, vetus & vniuersale omnium seculorum, omniumque Ecclesiæ Doctorum dogma, disertissimis sacrae Scripturae verbis innixum, a nouatorum peruersione vindicat? Quisquis Concilium eo nomine sugillare non veretur, idem sibi dictum putet a S. Hieronymo, quod Luciferiano eundem errorem errantiam olim respondit: Ita tu peruerse religiosus, dum serui Baptismo plusquam habuit tribuis, Dominicum destruis; cui nihil amplius relinquis. Nec minus gra-

uiter se ab Augustino, quam Petilianum, obiurgari existimet, ubi ait: Baptismus Ioannis ad Baptismum Christi non pertinet, nec eius pars vlla vel gradus est; alioquin aut tunc iterabatur aqua Baptismi Christi, aut si Baptismus Christi tunc per duas aquas perficiebatur, minus perfectus est modo, quia non datur illa, quæ per Ioannem dabatur. quodlibet autem horum impium ac sacrilegum est opinari. Quid igitur cum vniuersa Dei Ecclesia damnare formidè eiusmodi dogma, quod ad impiam & sacrilegam opinionem viam sternit? Nec ignoro, quam operose alibi contendas ostendere, quæstionem hanc otiosam & ambiguam esse, ideoque neutram in partem debuisse determinari a Concilio. At si otiosa, cur Calvinus, Melanchthon, alijque reformatores alteram partem contra SS. Patres & Ecclesiam catholicam post Luciferianos & Donatistas resuscitarunt, & tam pertinaciter nunc etiam urgent? Illud vehementer miratus sum, quod sententiæ tuæ patronum ipsum Augustinum alibi producere non verearis, quo nemo acrius catholicum dogma aduersus sui temporis hæreses propu-  
gna-

gnauit; vt solus Tridentinae definitioni  
tuendae abunde sufficiat. Sed mihi profes-  
sionis meae rationem reddere propositum  
est, vt non temere me antiquitatem con-  
tra nouitates, vniuersitatem contra priua-  
tas opiniones secutum ostendam; non vt  
contentionis ferram cum quoquam reci-  
procem.

○ Cæterum hisce tanquam leuioribus, &  
vtcumque ferendis multo iam grauiora &  
plane intoleranda subiungis: quæ non so-  
lum aures Batauas siue Saxonicas, sed etiã  
Græcas offendant. Ea sunt, Primatus su-  
pra reliquam omnem Ecclesiam Pontifici  
Romano iure diuino assertus; adeoq; in-  
fallibilis Spiritus sancti assistentia eidem,  
vt toti familiae Christi Præfecto, & Eccle-  
siae sub Christo Domino Capiti supremo,  
in rebus fidei totius Ecclesiae consilio ac  
nomine definiendis, attributa. cui ad-  
iungis mutilationem Eucharistiae, siue  
communione sub vna specie, & Missam  
sine communicantibus; quam Lutherus  
angularem vocat, ipsique Diabolo adeo  
absurdam & impiam visam asserit, vt no-  
cturno congressu validissime eam oppu-  
gnarit, & abrogandam esse Luthero pla-

nissime persuaserit. neque alia solemnibus Liturgiæ una cum priuata tollendæ ratio illi fuit. Quocirca quid eiusmodi Magistri auspicijs atque auctoritate Lutherani & Caluini reijciant, non magnopere mihi curandum existimo: dummodo id cum primitiue Ecclesiæ vniuersali sensu & praxi conueniat; quod in hisce non minus quam præcedentibus articulis liquido ostendi potest.

Nam Romanæ Ecclesiæ Primatum Græci ante Imperij diuisionem, & postea florente Orientis Imperio, diu ante schisma & secutam inde Turcicam seruitutem, agnouerunt. Irenæus Græcus scriptor potentiores illam principalem Ecclesiæ Romanæ, ad quam, ait, necesse est omnem conuenire Ecclesiam, hoc est, eos qui sunt undique fideles, non ab humano priuilegio, sed a fundatione & traditione Apostolica accersit. Nicæni Patres cum ad Romani Episcopi exemplum Patriarchalibus Ecclesijs prærogatiuas suas can. 6. confirmant, non iuris humani priuilegiū, sed antiquos mores, & veterem, hoc est, Apostolicam traditionem, obtendunt. Eundem Primatum confitentur Patres Sy-

no-

nodi Constantinopolitanæ can. 3. vbi Regiæ vrbis Episcopo secundum honoris locum decernunt. In Ephesini Concilij Actis Cyrillus Alexandrinus de Nestorij hæresi recens tum exorta ad Cælestinum PP. refert, longa Ecclesiarum consuetudine persuasus, vt ipse testatur. Eidem Sedis Romanæ authenticam, hoc est supremam & liberam pro arbitrio agendi auctoritatem, & loci sui vicariam potestatem confert Cælestinus; vt sententiam, qua Nestorium circumscripserat, eo efficacius potentiusque exequatur. Vnde nam illa authenticam Sedis Romanæ, ab humano an diuino Iure? Certe si S. Prosperum audiamus con. collat. cap. 41. Cælestinus Cyrillo ad exsecandam Nestorianam impietatem Apostolico auxiliatus est gladio. In eodem Concilio parte 2. act. 2. Philippus Presbyter gratulatur Synodo, quod lectis Cælestini literis sancta membra sancto Capiti se exhibuerint. Caput autem totius fidei, inquit, & Apostolorum est B. Petrus. Vides puto dignitatem Capitis, siue Primatum Ecclesiæ Romanæ B. Petro Apostolo, hoc est, iure diuino, niti. idque luculentis verbis mox idem

Phi-



Philippus copiosius declarans ait: Nulli dubium, immo seculis omnibus notum est, quod sanctus beatissimusque Petrus, Apostolorum Caput & Princeps, fideique columna, & Ecclesiæ Catholicæ fundamentum a Domino nostro Iesu Christo Salvatore humani generis ac Redemptore clauēs regni accepit, soluendique ac ligandi peccata potestas ipsi data est: qui ad hoc usque tempus, & semper in suis successoribus uiuit, & iudicium exercet. Huius itaque secundum ordinem Successor & Locumtenens sanctus beatissimusq; Papa noster Cælestinus Episcopus, nos ipsius præsentiam supplentes ad hanc sanctam Synodum misit. Hæc in Actis Ephesini Concilij. Verum quæ nulli tum dubia, sed seculis omnibus nota, nostro tamen tempore ut dubia, & antiquitati incognita, vel primo loco inter absurdas Romanæ Ecclesiæ assertions ponis, tractatu tuo contra Moguntinos §. 142. Dic bona fide, mi Calixte, cui tutius credam, tibi neganti, an affirmanti Concilio? Accedit quod Iuuenalis Hierosolymitanus ibidem act. 4. affirmat, morem fuisse inde ab ipsis deriuatum traditumq; Apostolis, ut Sedes An-

tio-

tiochena à Romana dirigatur, & apud eam iudicetur. Vnde act. quinta sancta Synodus vltimam de Ioanne Antiocheno sententiam Cælestini iudicio, reseruat. Tunc Apostolicam illam ἀπολεδίαν καὶ ὁμολογίαν ad humanum vel diuinum ius, hoc est, ad Petri Primatum referendum existimas? Chalcedonenſis Synodi Acta eundem Primatum Ecclesiæ Romanæ, in Petrum Apostolorum Principem collatum, innumeris propemodum locis confirmant. Omitto quæ in præliminaribus epistolis Imperatorum & Augustarum habentur; quod priuata vel domestica testimonia ex Occidente prolata possint videri; ea scilicet quæ epist. 15. 25. 26. & 33. leguntur. Sane actione 1. Beatissimus & Apostolicus Episcopus vrbis Romæ omnium Ecclesiarum Caput vocatur, quia nimirum Sedem Apostolicam gubernat. Act. 3. Dioscorus Episcopatu priuatur a Leone Papa per Legatos & sanctam Synodum, idque ope beatissimi & gloriosissimi Petri Apostoli, qui est petra, & crepido Ecclesiæ Catholicæ, & rectæ fidei fundamentum. Depositionis causam præcipuam non semel adducunt

cunt Patres, quod contra ipsam Sedem Apostolicam latrarit, & in sanctum Leonem excommunicationem promulgare conatus sit; hoc est contra ipsum illum, cui vineæ custodia a Salvatore commissa est; vt habet totius Synodi relatio ad Leonem: quem vocis B. Petri interpretem omnibus constitutum, Concilio vt Caput membris præfuisse aiunt. Et quamuis act. 16. ex Constantinopolitani Concilij decreto, secundum dignitatis locum Regiæ vrbis Episcopo confirment, nihilominus Primatum & eximium ac præcipuum honorem Romanæ Sedi conseruant: quod in eadem relatione Patres ita explicant, vt Apostolici splendoris radio, quo Roma fulgebat, Ecclesiam Constantinopolitanam illustrari, eiusque bonorum participatione ditari petant. Vides vir optime, quid de Primatus Romani origine ac fundamento Orientalis Ecclesia primis quinque seculis crediderit; priusquam machinationis vertigine in schismatis barathrum præceps ageretur. Nam post inuasam totius Illyrici, tum etiam Siciliæ & Calabriae iurisdictionē Ecclesiasticam, Constantinopolitanum Patriarcham Sedi

Apo-

Apostolicæ non solum æquare, sed etiam præferre conati sunt, Nilus, Barlaamus, alijque Schismatici, non solum liuore, sed etiam imperitia, & veteris Ecclesiæ disciplina ignoratione excoëcati. Quotiescunque tamen veritatis & vnitatis amor Græcorum animos subijt, eandem cum orthodoxa antiquitate sententiam professi sunt. Vnde in Synodo Florentina sess. 25. cum Latini Primatum Pontificis sacre Scripturæ definitioni dictisq; Sanctorum inniti scripsissent; Græci, vt suis quoque Patriarchalibus priuilegijs consulerent, addi voluerunt; Papam sua priuilegia habere iuxta Canones, & dicta Sanctorum, sacramque Scripturam, & acta Conciliarum. Vnde mox in decreto vñionis Primatus Pontificis iure diuino asferitur: quippe cui in B. Petro pascendi, regendi, & gubernandi vniuersalem Ecclesiam a Christo Iesu Domino nostro plena potestas tradita sit. Hæc Græca Ecclesia ex maiorum suorum & totius antiquitatis sensu; quæ hoc loco pluribus a me asseri necessum non est.

Nec magis Græcos offendere potest Communio sub vna specie, quam ipsi æque

vt Latini iam olim tenuerunt, atq; etiam hodie passim retinent. Nam recens baptizatis infantibus de solo calice guttam instillant; ægrotis autem & moribundis sola panis specie viaticum exhibent; vtrisque tamen verum & integrum Eucharistiæ Sacramentum hoc modo se tradere non dubitant. Idem cæteri omnes ad Orientem & Meridiem Christiani, præsertim Abassini, antiquo & perpetuo suæ Ecclesiæ more faciunt. Neque Eucharistiam mutilari existimauit antiquitas, cum fidelibus particulas panis consecrati ad priuatam communionem domum asportandas daret, vel ad Anachoretas in eremum mitteret. Omnium vero clarissime vtriusque Ecclesiæ consensum perpetuum ostendit communio ex præsanctificatis, qua Græci feriis Quadragesimalibus, Latini sola feria sexta maioris hebdomadæ vtuntur, ex antiquissimo vtrique instituto: neq; tum quidquam de Sacramenti mutilatione suspicabantur.

Liturgiam sine communicantibus Græcis iuxta ac Latinis in vsu nunc esse, doctissimi eius nationis Viri, & ipse vsus quem passim per Italiam cernere est, testan-

stantur; eoque falsam Chythræi criminationem refellit Allatius, cuius librū apud Batauos editum, tibi iam visum lectumq; non dubito. Sed ne vocum ambiguitate fallamur, dicam tibi, mi Calixte, quid hic tum in cæteris Ecclesijs vrbicis, tum præsertim in maioribus Basilicis fieri obseruauerim; vbi festis diebus, hoc præsertim anno, in tanta exterorum frequentia, myriades hominum ad sacram Communionem confluunt. Ibi summo mane Parochus, aut alius Sacerdos, ad destinatum huic functioni Altare Dominici Corporis Sacramentum consecrat, ea particularum multitudine, quæ populo fidelium communicando eo die suffectura videatur. communicant tum de eiusdem Sacerdotis manu quotquot sacro officio adsunt: cæteri, qui & ipsi communicaturi toto deinde antemeridiano tempore infinito promodum numero citius tardius templum accedunt, primum Missæ siue Liturgiæ officio adsunt, quod ob populi frequentiam & commoditatem a diuersis Sacerdotibus ac diuersa Altaria subinde celebratur: eoque finito ad alterum illud Altare, quod huic ministerio destinatum di-

xi, Communionem accipiunt. Tu ne Sacerdotem illum sine communicantibus Missam celebrasse; aut eos qui celebranti adfuere, cum Sacerdote suo non communicasse affirmabis? non dicam communionem precum & vnitate spiritus, sed ipsa participatione specierum sacramentalium; quamuis ad aliud Altare de alterius Sacerdotis manu eam acceperint? Puto te non dicturum; nisi vnā Ecclesiam, vnum Altare, vnum Sacrificium, vnum Sacerdotium, vnā inter omnes fideles vnius eiusdemque panis communicationem, & vnā vnius corporis cum vno Capite vnionem negaueris. quam negare certe non potest, nisi qui factionum studio Christi Ecclesiam plane ignoret. Tu vero, mi Calixte, numquid omnes qui olim sacræ Liturgiæ officio aderant, de Eucharistia, quæ per singulas Synaxes celebrabatur, communicasse existimas? Neque hoc puto dixeris; qui antiquissimorum Patrum de communicantium infrequentia querelas non ignoras. Non laudans dico, sed vt necessitatis legem etiam tunc abfuisse ostendam.

Sed quoniam tu ea quæ in Catholicorum



Liturgia minus probanda censes, exposuisti; liceat mihi eadem libertate de noua vestra vicissim ex te perquirere: qua Pontificiæ Missæ errores sublato vos quidem dicitis; nos omnem veteris Liturgiæ vel Græcæ vel Latinæ faciem abolitam euerfamque certo scimus. Non dicam de Calvinianis, Anabaptistis, Socinianis, quos præter externos ritus ipsius quoque Sacramenti veritatem sustulisse ingenue fateris: sed Lutheranorum Missa, si tamen hoc nomine appellanda, quid præter merum nomen apud vos habet? quamuis & hoc ferme interciderit. Synaxes illæ solemnes, quibus vnio Ecclesiæ cum Christo Capite per Oblationem, Communionemque sanctissimi Corporis eius fouetur ac nutritur, ita olim omnibus communes erant, vt ijs non adesse piaculum duceretur grauissimum, & poenæ supplicijque loco esset; si quis vel integræ actioni, vel parti præcipuæ interesse prohiberetur, quæ Canonis nomine nunc appellatur. Eo enim cum post orationes aliquot & lectiones sacras, earumque explicationes peruentum esset, præter Catechumenos & energumenos, etiam poeni-

tentes sanctuario excludebantur. Tota hæc actio apud vos in concionem seu *synagoga* mutata est: huius deinde dimissa concione appendicula quædam est qualiscunque illa Missa, seu communionis formula, veteris Liturgiæ in locum subintroducenda; quam cæteri ea die non communicaturi parum aut nihil ad se pertinere putant. Ita nunc Concio caput est Synaxeos, cuius pars ex veteris Ecclesiæ instituto & præparatio esse solebat.

Sed profecto ut te Missa catholica sine communicantibus offendit, ita mihi multo magis communio vestra sine Missa displicet. Quod enim Missæ vestigium in vestra illa actione, præter externa quædam, vestes dico, & vasa, & nonnulla inania catholicæ Liturgiæ imitamenta? Quomodo enim Missa sine oblatione? quomodo oblatio sine Sacerdote? quomodo Sacerdos sine Ordinatione Episcopi? quomodo Episcopus sine legitima & Apostolica successionem? vel quomodo verum Sacramentum Corporis Christi, extra Christi Ecclesiam? Manifestum enim est, ut ait S. Cyprianus, apud omnes Hæreticos Spiritus sancti gratiam non esse,  
nec

nec eorum Sacrificia, quamdiu Hæretici sunt, posse Deo placere: neque spiritualis gratiæ sanctificationem Sacrificijs eorum tribui, qui offerunt ab Ecclesiastici corporis vnitate disiuncti. Solius enim Ecclesiæ Deus delectatur sacrificijs, quam Sacrificium Deo facit vnitas spiritualis: vbi & fidei veritas nullam credit in Trinitate distantiam, & pacis tenacitas fraternam seruat in charitate concordiam. Attende tibi, ait lex Deuteronom. xix. ne offeras holocausta tua in omni loco quemcunque videris; sed in loco, quem elegerit Dominus in vna tribuum tuarum. Audi, quis sit locus electus, ait S. Augustinus Rogatiano Donatistæ, & quæ tribus Domini. In Psalm. 131. habes: quoniam elegit Dominus Sion, elegit eam in habitationem sibi. Hic est locus electus, hic mons sanctificatus, hæc ciuitas supra montem posita, vt abscondi non possit; hæc radix catholica, hæc vitis fructifera longe lateque diffusa: & ego, inquit, dico tibi: Attende tibi ne offeras in omni loco, id est, in omni hæresi, & dicas; & hic Deus, & ibi Deus est. Qui alibi præter Ecclesiam colligit, ait Cyprianus,

Christi Ecclesiam spargit. vnica enim Sponsa Christi vnā Sponsi domum nouit, vnus cubiculi castitatem casto pudore custodit. Stare tu & viuere putas posse de Ecclesia recedentem? sedes sibi alias & diuersa domicilia condentem? Sacramentum Paschæ nihil aliud in Exodi lege continet, vt Agnus qui in figura Christi occiditur, in domo vna edatur. Caro Christi & sanctum Domini eijci foras non potest: nec alia vlla credentibus præter vnā Ecclesiam domus est. Vna autem Ecclesia, vna & intus esse & foris non potest. Qui enim de Ecclesia exierunt, certe in Ecclesia non sunt. ideoque quæcunque extra Ecclesiam tenentur & Sacramenta, & Scripturæ, ad speciem tenentur, non ad salutem: cum ista in sola Ecclesia catholica salubriter habeantur, vbi Fides cum Charitate retinetur. Extra hoc corpus, inquit S. Augustinus, neminem viuificat Spiritus sanctus, per quem charitas Dei diffunditur in cordibus nostris. neque enim particeps est diuinæ charitatis, qui hostis est vnitatis.

Tu vero optime nosti, quæ vnitas sit apud eos qui ab Ecclesia catholica recesserunt:

runt: vbi vt omnes a Catholicis, ita a se-  
ipsis singuli ferali odio dissident. Etenim  
vt Sampsonis vulpeculæ caudis colligatæ  
capite in diuersa tendebant, ita illi solo  
catholicæ veritatis odio coniuncti cætera  
omnia toto cælo differunt. Quinimo so-  
la vnionis conciliandæ mentio, pacisque  
studium omnium odio in se concitando  
sufficit. Hic te ipsum tibi propono, qui  
non meminisse non potes, quomodo Tu-  
ronensi colloquio Augustani tui ad Calui-  
nianos te reiecerint, tum vero nuperi li-  
brorum indices ostendunt, quam non fra-  
terne iidem congregales tui scriptis non  
vno loco prouulgatis te exagitent. Ita  
dum nescio quod Ecclesiæ simulacrum ex  
omni Sectarum, Schismatumque genere,  
tanquam Babylonici colossi pedes ex fer-  
ro, testa, lutoque conflare conaris, illi  
ipsi qui conglutinari nec possunt, nec vo-  
lunt, te oleum operamq; perdentem con-  
uicijs contumelijsque traducunt: adeoque  
dum omnium esse cupis, nullius es; & Ec-  
clesia, cuius ideam te fingis, spatio ferme  
imaginario coarctatur. Quid enim ma-  
gis dissonum ab ipso fidei Symbolo? quid  
religionis Christianæ principijs magis ad-

uersum dici aut cogitari potest, quam ut puriorem Ecclesiam ad Holsatiæ nostræ angulum, & vnā atque alteram Ducatus Brunswicensis Præfecturam restringere quis velit? cæteras Orbis Prouincias erroribus & superstitionibus oppressas ad veritatis lumen caligare existimet?

Agnosco sane Academiam vestram singulari quodam Dei beneficio, & sapientissimorum Principum cura, Viris eruditissimis & accurata docendi ratione cæteris per Septentrionem Scholis palmam præripere; helluationes & morum corruptelam, bonæ mentis pestem, obnixè auersari; tum quod præcipuum duco, maiorem sacrae antiquitatis cognitionem ad fidei controuersias disceptandas adhibere: toto tamen cælo abest, ut Catholicæ Ecclesiæ ad inuidiam obduci possit. imo quantiscumque doctrinae præsidij felicitè instructa, hoc vno est infelix, quod Catholica non est; dum Lutheri partem sequuta, scissuras contra vniuersi Orbis vnitatem fouendas suscepit.

Extrema malorum sunt Hæresis & Schisma, vnde præsens fidei iactura, & ineuitabile salutis naufragium sequitur, ab hac  
pe-

peste nemo vnquam pius, nemo sapiens  
vitiatae disciplinae & corruptis Ecclesiae  
moribus remedium quaesuit. Ipsa enim  
separatio impios ostendit, vt ait Fulgen-  
tius, quae tales ecclesiastico corpori non  
socios, sed aduersarios facit. Neque enim  
a conuentu ecclesiasticae vnitatis corpore  
separarentur & loco, nisi prius ab eccle-  
siastica fide discederent corde corrupto.  
Habet quidem ager Dominicus praeter bo-  
ni seminis frugem etiam zizania, eaque,  
proh dolor, copiose ab inimico homine  
superfeminata. verum non ideo segetem  
proteri aut exuri iubet pater familias; sed  
zizania cum ipsa fruge ad messem vsque  
tolerat. Area hanc Domini ventilabro  
permundanda paleas frumento mixtas vs-  
que in finem seculi sustinere non recusat;  
Exurentur suo tempore zizaniorum fasci-  
culi sine messis detrimento: illaeso tritico  
paleae dispergentur. Neminem intra Ec-  
clesiam catholicam recte credentem, &  
bene viuentem aliena peccata maculant.  
Animae ac salutis suae iniurius est, qui pa-  
learum odio aream deserit; cum frumen-  
tum non nisi ex area congregetur in hor-  
reum.



Nec despicienda est Christi Sponsa, quod diurno peregrinationis æstu fusca; quod decolorata longæ serenitatis Sole; quod etiam seculari pulvere aspersa nunc videatur. nigra quidem illa, sed formosa: cuius gloria omnis interna cum sit, æmulum oculis, in nævos rugasque cutis externæ tantum intentos fallit.

Sed bene est, quod inanis illa & fictitia Ecclesiæ larua, quam Sectarum auctores magna puritatis specie venditant, nullis fucorum pigmentis hætenus ita incrustari potuit, quominus suam prodat deformitatem: quippe cui nihil solidæ pietatis & sanctimonix subesse statim deprehendit, qui paulo penitus introspicit. Nam quod tu seueritatem disciplinæ ecclesiasticæ fratrum Bohemicorum exemplo reduci desideras, ea vetus querela est, & inane votum, a Melanchthone ante annos CXV. conceptum, vagiente adhuc in cunis Lutheranismi: quem si senescentem nunc adulta confirmataq; licentia ad obedientix iugum retrahi posse existimas, sane falleris. Excutare iugum, non mutare voluit; omnemque conscientix coercendæ rationem carnificinam arbitratur. Cur enim

enim non de veteri poenitentium discipli-  
na potius restituenda cogitas? cur non  
vitæ religiosæ, & consiliorum euangeli-  
corum obseruationem in vsum reuocare  
studes? Sed ita fit; filius ille adolescen-  
tior cum domum mensamque paternam  
reliquisset, dissipata substantia peregre ad  
porcorum siliquas se proiecit. Ita post  
conculcatas & exustas a Luthero Cano-  
num leges, Patrumque regulas, post pro-  
scriptos Episcopos, post euerfa sanctioris  
vitæ asceteria, monitores correctoresque  
Bohemicos desideratis: quasi tam altum  
profanatae religionis vlcus tali catapla-  
smate perfanari possit.

Ego vero, mi Calixte, multo opportu-  
norem medendi modum tibi patriæque  
nostræ proponerem, si sanis consilijs lo-  
cus relinqueretur; maiorq; veritatis pie-  
tatisque restaurandæ, quam factionum  
propugnandarum cura & sollicitudo esset:  
cogitarentq; Principes, quæ mala in Rem-  
publicam, quæ vitia & corruptelæ in mo-  
res vitamque priuatam, ex religionis sub-  
uersione profluxerint: quam timendi sint  
ipsis hypocritæ, & fanatici homines, qui  
defecatißimam religionis puritatem pro-  
fess.

feſſi, diuinas humanasq; leges promiſcua facilitate proculcant, & ſcleribus atque parricidijs eo graſſantur, ne a quoquam dependeat, vel coërceri poſſit effrenis quiduis agendi licentia. Merito Eccleſia Catholica Mater Chriſtianorum veriſſima, inquit Auguſtinus, non ſolum ipſum Deum, cuius adeptio vita eſt beatiffima, puriſſime atque caſtiſſime colendum prædicas; ſed etiam proximi dilectionem atque charitatem ita complecteris, vt variorum morborū quibus pro peccatis ſuis animæ ægrotant, omnis apud te medicina præpolleat. Tu cum ætates gradusque omnes officijs ſuis inſtruas, doces etiam Reges proſpicere populis, mones populos ſe ſubdere Regibus; quibus honor debeatur, quibus affectus, quibus reuerentia, quibus timor, quibus conſolatio, quibus admonitio, quibus cohortatio, quibus diſciplina, quibus obiurgatio, quibus ſupplicium, ſedulo doces; oſtendens quemadmodum & omnibus omnia, & omnibus charitas, & nulli debeatur iniuria. Deinde vitæ ſpiritualis magiſtram eandem prolixè celebrans, addit præclare: Quod vtinam iſti Hæretici ( Eccleſiæ ſcilicet

Catholicæ contemptores ) intelligere si valerent, nusquam profecto Deum nisi apud te, atque in tuo gremio, minime superbi & bene pacati venerarentur. Ad hanc tutius confugies, mi Calixte, quam ad fraternitatem Bohemicam, si Ecclesiæ doctrinam disciplinamque apud nostros restitutam cupias.

Ad hunc salutis portum te inuitare non desinam, ad quem sedulo peruestigandum tua in primis operâ me excitatum profiteor. Nam Romanam Ecclesiam, vnam illam, sanctam, Catholicam, & Apostolicam esse non tam facile mihi licuisset perspicere, nisi antea tuo ductu certo credidissem, eam non Antichristi sedem, & Babylonicæ meretricis lupanar, sed vere Ecclesiam etiam nunc esse, & salutis spem pie in ea viuentibus neutiquam denegandam; eo quod præcipua fidei capita, quibus fundamenti instar salus nostra innitur, saluâ & immota retineat. De reliquis, sin absque partium studio esset, unionem aliquam vel saltem syncretismum iniri posse existimabas. Ad hæc multa temerario ille reformationis tumultu abrogata dolebas, quæ cum magno pietatis

emo-

emolumento potuissent retineri, multa quoque Ecclesiæ Catholicæ falsa, & absurda fatebaris affingi, quæ aut plane ignoret, aut ipsa improbet. Ita tu Hermæ vialis instar in biuio defixus, digito intento viam, qua ad Ecclesiam Catholicam pergerem, mihi subindicasti.

Quod autem a sententia, quam maturo consilio post longas atq; ardentissimas preces amplexus sum, tuo colloquio me dimoueri posse existimas, id vero fiet, vbi aliam Scripturam, alia Conciliorum Acta, aliam ecclesiasticam historiam, & diuersa Cypriani, Augustini, aliorumque Patrum scripta, ab ijs quæ certa & indubitata Romæ consului, mihi exhibueris. Nam elusiones, & subterfugia Spalatensis, & similium mangonum, in tam perspicua antiquitatis sententia admittere non possum.

Interim te, mi Calixte, per Deum & Christum salutis nostræ auctorem oro atque obsecro, vt animæ tuæ negotium tibi commendatissimum habeas; serioque cogites de Ecclesia Dei, Columna & Firmamento veritatis, qualem eam ab Apostolis, Virisque Apostolicis fundatam, totoque

que Orbē diffusam, prima quinque secula  
viderint : quibus illa fidei dogmatibus,  
quibus Sacramentis, qua disciplina, quo  
regiminis modo tunc fuerit instructa ;  
quanto studio puritatem & vnitatem suam  
aduersus hæreses & schismata vindicarit .  
Eius statum faciemque vbi diligenter in-  
spexeris , tum sine odio studioq; partium  
dispice , quam omnia illa nunc salua su-  
persint in Romana , cæterisque cum Ro-  
mana communicantibus Ecclesijs ; eamq;  
& nominis & dogmatis catholici hære-  
dem , atque Apostolici depositi custodem  
agnosce . E contra perpende , quam tru-  
culenter & impie in Matris viscera sæuie-  
rint infausti illi reformatores ; vt faciem  
eius deturpauerint , artus dilaniarint : vt  
pro veteri catholica doctrina suos quique-  
substituerint errores & deliria : vt sacram  
Scripturam non secundum perpetuum &  
vniuersalem sensum & consensum SS. Pa-  
trum explicent , sed ex cerebri sui libidi-  
ne nouis & priuatis interpretationibus  
peruertant : vt Sacramenta eorumque ri-  
tus abrogarint ; Apostolicas traditiones ,  
omnemque veterem disciplinam, Patrum  
& Conciliorum saluberrimis Constitutio-  
ni-

nibus firmatam, sustulerint, vel eneruarint; consilia euangelica & vitæ sanctioris studia exploserint; hierarchiam ecclesiasticam, & omnem præcipiendi & parendi distinctionem confuderint. Sublata Episcoporum auctoritas, nudo tantum nomine ad ditiones redditusque Ecclesiarum occupandos nonnuspian seruat. Ordines Presbyterorum, & Diaconorum, cæterique officiorum & ministeriorum gradus abrogati; denique noua Ecclesiæ facies introducta omnibus seculis ignota; ad cuius conspectum quotquot inde ab Apostolis fuere Doctores, Patres, Episcopi, Virique sancti, velut ad monstrum & errorum lernam nunc cohorrescerent.

Et quoniam te Virum doctum, & antiquitatis sacræ vnum fere præ cæteris studiosum compello, cogita quanta Septentrioni nostro ex infelici illa religionis subuersione ignorantia coecitas incubuerit. Patrum, & Ecclesiæ Doctorum non scripta tantum sed nomina ipsa ignota non solum vulgo, sed ijs qui in Ecclesijs Scholisque docendi munus sustinent. Si quæ forte cuiquam nota aut lecta, ex rhapsodis



dis & Ecclesiæ perduellibus ea tantum  
confarcinantur loca, quæ ad veritatem  
oppugnandam utcunque facere videntur.  
Scis quali; librorum supellectile Ministri  
& Prædicantes apud nos instructi, ex qui-  
bus postillarum lacunis illi pastores do-  
ctrinæ pabulum crudum indigestumque  
gregi suo proponant. Contra si publicas  
priuatasque Bibliothecas hic inspicias, si  
studia cordatorum hominum expendas,  
statim vides, quam omnia ad primiti-  
uæ Ecclesiæ mentem doctrinamque intelli-  
gendam explicandamque tendant. Libri  
& monumenta antiqua, præsertim sacra,  
summo studio & impensis maximis vindi-  
que parantur; & in ijsdem publica lucē  
donandis doctorum hominum desudat  
industria. Ita nuper Græcorum Patrum  
in Prophetas commentarijs, alijsque in ve-  
tus Testamentum quas vocant catenis non  
vno volumine comprehensis, immorien-  
tem vidi optimum doctissimumque Cor-  
derium, alios Concilijs antiquis & SS. Pa-  
trum operibus ab interitu vindicandis;  
alios historiæ ecclesiasticæ Annalibus pro-  
cudendis occupatos noui. & ne quid in  
tenebris lateat, quo fides catholica illu-  
stra-

strari possit, sunt qui veterum Christianorum coemeteria cryptasque Martyrum ingenti Romæ subterraneæ opere descriptas in lucem edant. Ita vnus omnibus antiquitatis retinendæ amor, nouitatis auersatio. Eadem mihi nouæ sectæ deferendæ, eadem antiquæ fidei amplectendæ causa, ad quam te & Vossium nostrum iterum atque iterum inuito, certissime æternæ salutis lucro, quod extra Catholicam Ecclesiam frustra speratis. Hoc tandem, mi Calixte, rogo, quod ille in simili caussa apud S. Augustinum; si institutū & exemplum meum piget imitari, noli aduersari. Vale. Romæ, Anno Iubilei M D C L. Kal. Septembris.

## EPISTOLA GEORGII CALIXTI

Ad Christophorum Ranzouium

*Salutem ab auctore salutis.*

ENEROSE Vir, Domine & amice longe carissime, quoties huc venerunt, qui ex Italia redirent, toties de te sciscitatus sum. Fecit enim tuum pietatis, virtutis, & eruditionis studium, cuius hic luculenta specimina edidisti, ut te in oculis geram, & de incolumitate tua sollicitus sim; certa spe nixus, te communi nostræ patriæ magno ornamento insignique emolumento breui fore. Ut autem fieri solet, alij nihil de te referre poterant, alij nunciabant te Romæ degere, & familiaritatem contraxisse cum Henrico Iulio Blumio, nostræ olim disciplinæ alumno. Cuius rei certiores nos faciebat haud ita pridem Franciscus Henricus Vitzendorpius, Patritius Luneburgensis, nisi mihi memoria imponit, cui iam senescens, quod talia attinet, non semper possum fidere. Sed nuper etiam non nemo hac

transiuit, qui me quidem alloquutus non fuit, nec mihi innotuit, sed alijs narrauit, te admodum familiarem factum Lucæ Holstenio, & nonnullis Iesuitis, qui multoties tibi scrupulos inijcerent, & dubia mouerent, vt propemodum inciperes vacillare, & Religionem Pontificiam reformatæ anteferre. Venit id ipsum ad aures nostri Vossij, eiusque animum vehementer perculit, vt ad me quoque deferret. Commouebare quidem, fateor, aliquantulum: sed cum me recolligerem, & prudentiam vimque ingenij tui expendere, & Vossium bono animo esse iussi, & ipse fui; non ignarus, quanta illa tibi diuinitus concessa, & quam frequenter fallant, & plane infidi nuncij sint rumores! Non potes ignorare, inter omnes partes, in quas hodie, prohi dolor, scinditur populus Christianus, Pontificiam plurimis superstitionibus, corruptelis, figmentis, & nouitatibus scatere: inter quas etiam est, qui hodie celebratur Iubileus, antea apud Christianos inauditus, & demum ante annos CCCL. a Bonifacio IX. homine improbo institutus. Quamquam hoc malorum minimum videri possit, cum

cum dictatibus Hildebrandicis aliquanto antiquioribus comparetur. Qui Pontificijs se iungit, cogitur se separare ab omnibus alijs Christianis, qui sunt per totum Orbem terrarum; & quidem ob causas aliquando non admodum graues. Cogitur enim anathema illis dicere, qui Purgatorium non admittunt, qui septenarium numerum Sacramentorum in dubium vocant, qui Baptismum Ioannis & Christi eundem fuisse non fatentur. Iam quod attinet Primatum Pontificis de iure diuino, eiusque infallibilitatem, mutilationem Eucharistiæ, & Missam sine communicantibus, hæc talia sunt, vt a Christianis Græcis, Lutheranis, & Calvinianis, quemadmodum appellamus, reijciantur; licet ipsi propter eiusmodi reiectionem siue improbationem a Pontificijs anathemate feriantur. Græca Ecclesia sicut sub iugo tyrannico gemit, & dira seruitute premitur; ita paulatim ignorantia quadam opprimitur, & necessaria ad iudicium de doctrinis controuersis ferendum eruditione destituitur. Calviniana hinc magnam maculam contrahit, quod contra disertam Seruatoris adsertionem Cor-

poris Sanguinisq; Dominici in sancta Eucharistia præsentiam inficiatur. Lutheranæ, quæ dogmati vbiquitatis inhærescit, vix minorem, dum hunc satis crassum errorem tuetur & obtrudit. Mi nobilessime Ranzbui, ausim affirmare, vix alibi Ecclesiam inueniri melius comparatam, quam in nostra patria, & hic in Ducatu Brunsvicensi, ditionis VVulfebutenlicæ & Calembergicæ. Exulant enim inde non modò superstitiones & corruptelæ Pontificiæ, sed etiam Calvinismus, qui præsentiam in Eucharistia negat, & illaudabile dogma vbiquitatis. Contra inscientiam quoque in Academiâ pugnamus, quantum possumus, & optimæ eruditionis studia alias fugientia retinere cupimus & stabilire. Scis etiam pro pietatis & sanctimonix studio nos satagere, & quod doceamus absque eo gratiam Dei, & salutem firmam, & indubitatam subsistere non posse. Superâmur tamen fateor, quod feueritatem discipline ecclesiasticæ ad pietatem omnino facientis attinet, a Fratribus Boemicæ confessionis. Cæterum tuo consilio & prudentia & auctoritate in patria nostra, quæ adhuc desiderari pos-

possint, aut emendari postulent, aliquando suppletum, & correctum iri spem omnino certam concepi. Qua ne fruster, faxit Deus Optimus Maximus, tibi que inspiret, quæ huc faciant, & ad illustrandam diuinam gloriam, & promouenda patriæ Ecclesiæ Reique publicæ emolumenta. Si quis autem scrupulus iniectus, ei quæso locum concedere noli. & si forte remouere totum nondum possis, ita suum iter institue vt in reditu nos inuisas: nullus enim dubito, per auxilium diuinum, & mutuam nostram collationem facile sublatum iri. Bene vale & age feliciter nostri memor, quemadmodum nos tui. Ex Academia Iuliz V I. Maij. C I O I O C L.

Generositati tuæ addictissimus

GEORGIVS CALIXTVS,





1. *Deus* 2. *Deus* 3. *Deus* 4. *Deus* 5. *Deus* 6. *Deus* 7. *Deus* 8. *Deus* 9. *Deus* 10. *Deus* 11. *Deus* 12. *Deus* 13. *Deus* 14. *Deus* 15. *Deus* 16. *Deus* 17. *Deus* 18. *Deus* 19. *Deus* 20. *Deus* 21. *Deus* 22. *Deus* 23. *Deus* 24. *Deus* 25. *Deus* 26. *Deus* 27. *Deus* 28. *Deus* 29. *Deus* 30. *Deus* 31. *Deus* 32. *Deus* 33. *Deus* 34. *Deus* 35. *Deus* 36. *Deus* 37. *Deus* 38. *Deus* 39. *Deus* 40. *Deus* 41. *Deus* 42. *Deus* 43. *Deus* 44. *Deus* 45. *Deus* 46. *Deus* 47. *Deus* 48. *Deus* 49. *Deus* 50. *Deus* 51. *Deus* 52. *Deus* 53. *Deus* 54. *Deus* 55. *Deus* 56. *Deus* 57. *Deus* 58. *Deus* 59. *Deus* 60. *Deus* 61. *Deus* 62. *Deus* 63. *Deus* 64. *Deus* 65. *Deus* 66. *Deus* 67. *Deus* 68. *Deus* 69. *Deus* 70. *Deus* 71. *Deus* 72. *Deus* 73. *Deus* 74. *Deus* 75. *Deus* 76. *Deus* 77. *Deus* 78. *Deus* 79. *Deus* 80. *Deus* 81. *Deus* 82. *Deus* 83. *Deus* 84. *Deus* 85. *Deus* 86. *Deus* 87. *Deus* 88. *Deus* 89. *Deus* 90. *Deus* 91. *Deus* 92. *Deus* 93. *Deus* 94. *Deus* 95. *Deus* 96. *Deus* 97. *Deus* 98. *Deus* 99. *Deus* 100. *Deus* 101. *Deus* 102. *Deus* 103. *Deus* 104. *Deus* 105. *Deus* 106. *Deus* 107. *Deus* 108. *Deus* 109. *Deus* 110. *Deus* 111. *Deus* 112. *Deus* 113. *Deus* 114. *Deus* 115. *Deus* 116. *Deus* 117. *Deus* 118. *Deus* 119. *Deus* 120. *Deus* 121. *Deus* 122. *Deus* 123. *Deus* 124. *Deus* 125. *Deus* 126. *Deus* 127. *Deus* 128. *Deus* 129. *Deus* 130. *Deus* 131. *Deus* 132. *Deus* 133. *Deus* 134. *Deus* 135. *Deus* 136. *Deus* 137. *Deus* 138. *Deus* 139. *Deus* 140. *Deus* 141. *Deus* 142. *Deus* 143. *Deus* 144. *Deus* 145. *Deus* 146. *Deus* 147. *Deus* 148. *Deus* 149. *Deus* 150. *Deus* 151. *Deus* 152. *Deus* 153. *Deus* 154. *Deus* 155. *Deus* 156. *Deus* 157. *Deus* 158. *Deus* 159. *Deus* 160. *Deus* 161. *Deus* 162. *Deus* 163. *Deus* 164. *Deus* 165. *Deus* 166. *Deus* 167. *Deus* 168. *Deus* 169. *Deus* 170. *Deus* 171. *Deus* 172. *Deus* 173. *Deus* 174. *Deus* 175. *Deus* 176. *Deus* 177. *Deus* 178. *Deus* 179. *Deus* 180. *Deus* 181. *Deus* 182. *Deus* 183. *Deus* 184. *Deus* 185. *Deus* 186. *Deus* 187. *Deus* 188. *Deus* 189. *Deus* 190. *Deus* 191. *Deus* 192. *Deus* 193. *Deus* 194. *Deus* 195. *Deus* 196. *Deus* 197. *Deus* 198. *Deus* 199. *Deus* 200. *Deus* 201. *Deus* 202. *Deus* 203. *Deus* 204. *Deus* 205. *Deus* 206. *Deus* 207. *Deus* 208. *Deus* 209. *Deus* 210. *Deus* 211. *Deus* 212. *Deus* 213. *Deus* 214. *Deus* 215. *Deus* 216. *Deus* 217. *Deus* 218. *Deus* 219. *Deus* 220. *Deus* 221. *Deus* 222. *Deus* 223. *Deus* 224. *Deus* 225. *Deus* 226. *Deus* 227. *Deus* 228. *Deus* 229. *Deus* 230. *Deus* 231. *Deus* 232. *Deus* 233. *Deus* 234. *Deus* 235. *Deus* 236. *Deus* 237. *Deus* 238. *Deus* 239. *Deus* 240. *Deus* 241. *Deus* 242. *Deus* 243. *Deus* 244. *Deus* 245. *Deus* 246. *Deus* 247. *Deus* 248. *Deus* 249. *Deus* 250. *Deus* 251. *Deus* 252. *Deus* 253. *Deus* 254. *Deus* 255. *Deus* 256. *Deus* 257. *Deus* 258. *Deus* 259. *Deus* 260. *Deus* 261. *Deus* 262. *Deus* 263. *Deus* 264. *Deus* 265. *Deus* 266. *Deus* 267. *Deus* 268. *Deus* 269. *Deus* 270. *Deus* 271. *Deus* 272. *Deus* 273. *Deus* 274. *Deus* 275. *Deus* 276. *Deus* 277. *Deus* 278. *Deus* 279. *Deus* 280. *Deus* 281. *Deus* 282. *Deus* 283. *Deus* 284. *Deus* 285. *Deus* 286. *Deus* 287. *Deus* 288. *Deus* 289. *Deus* 290. *Deus* 291. *Deus* 292. *Deus* 293. *Deus* 294. *Deus* 295. *Deus* 296. *Deus* 297. *Deus* 298. *Deus* 299. *Deus* 300. *Deus* 301. *Deus* 302. *Deus* 303. *Deus* 304. *Deus* 305. *Deus* 306. *Deus* 307. *Deus* 308. *Deus* 309. *Deus* 310. *Deus* 311. *Deus* 312. *Deus* 313. *Deus* 314. *Deus* 315. *Deus* 316. *Deus* 317. *Deus* 318. *Deus* 319. *Deus* 320. *Deus* 321. *Deus* 322. *Deus* 323. *Deus*

1001

சுருதிநிர்ணயம். சிவசுந்தரி

REVISED EDITION









S. Silvestri montis  
quintalis

